

東
華
續
錄

東華續錄

光緒五十二

臣朱壽朋敬編

臣沈彭年恭校

光緒九年癸未春正月癸未朔 上詣 大高殿 奉先殿 壽康殿行禮 皇子故原任天津河間兵備道劉秉琳事蹟交國史館立傳○延茂奏國家吏治首重得人內而部院大臣外而各省督撫皆與人才之升降相維繫所謂大臣法則小臣廉也苟大臣偷惰卑污則凡百效尤不以爲恥而欲人才之奮興豈可得乎伏讀 上諭力戒因循積習整肅官常訓誨諄諄倍極詳切奴才以爲賞罰者 朝廷之大權欲旌別淑慝必自大臣始如兵部尙書志和人本平庸衰弱多病且係歷被參劾棄錄用之人宜如何前滌齋汪楚躬率屬乃志和自擢任兵部以來每月進署不過一二次甚或一月之久並不進署且部院各堂官進署於大堂檐下降輿定制也而志和則乘輿直至公座前始行降輿其管理內務府事務接見僚屬語多戲謔儼同市井有內務府司員在直廬面回公事志和則偃臥以聽公事未畢而志和即息酣睡矣此皆兵部內務府堂司各員所共聞共見者再志和與市僧鄭六來往蹤跡詭秘凡係內務府之請託也莫不由鄭六關說而成道路喧傳衆口如一鄭六者協辦大學士文煜之家丁張福乞養子也應

藉張福開設木廠蒙捐都察院經歷志和任崇文門監督時派鄭六爲前堂驗貨家丁兼辦後堂委員事
彼時各委員無不羞與爲伍上年內務府承修銅鍊寶匣等工志和又派鄭六爲商人夫鄭六一市僧耳
忽而爲家丁忽而爲委員忽而爲商人皆出自志和一人之所委其親任市僧敗壞官常莫此爲甚如已
革都察院左副都御史崇勳與市僧往來奉 旨罷斥今志和之偷憎卑汙幾不堪與崇勳相並論又如
去歲臘底內務府之賂遺也其門如市此皆道路之人所睥睨而訕笑者也奴才職非糾彈且與志和
素無嫌怨良以 朝廷詔求人才力圖整頓若偷憎卑汙之人苟安尸素將何以儆官邪而伸黜陟相應
請 旨立予罷斥抑或 特簡公正大臣秉公查辦 上諭鴻臚寺少卿延茂奏兵部尙書志和衰庸偷
惰品行卑汙據實糾彈一摺著派廣壽張之萬將所參各節秉公確查據實具奏○頒給順天昌平州
龍神祠匾額○辛卯祈穀於 上帝遣奕諒恭代行禮○壬辰諭伯彥訥謨祜閣散銘奏查辦要案牽涉
前任總督請旨辦理一摺據核查辦 東陵營房工程一案現據守備隋登第呈稱前任總督景瑞准向
商人借用薪水並據商人呈出帳本原估續估兩次共應領銀二十三萬八千七百五十八兩零供稱初
次領銀十二萬八千三百七十六兩零內實領到革弁徐永興交給九萬九千七百五十六兩零欠領銀
二萬八千六百十九兩零經前任總督景瑞交派商人令將徐永興虧欠銀兩成全辦理並有虧項甚多

另爲設法等語此項工程前後撥銀二十三萬餘兩何以該商人供稱僅領過銀九萬九千餘兩此外虧欠甚鉅著景瑞按照所奏各節逐款明白回奏不准稍有欺飾○甲午欽奉 慈禧端佑康頤昭豫莊誠皇太后懿旨醇親皇奕譞之第五子命名載灃○諭前福建布政使王德榜著發往浙江交劉秉璋差委○革禮部右侍郎寶廷職○湖北布政使王大經以病免以蒯德標爲湖北布政使黃彭年爲湖北按察使○湖北提督傅振邦以病免以程文炳爲湖北提督○諭前據林肇元奏請將捐資帶練殄擒首要之降調候補道夏聲律等開復革處分當令該部議奏旋據給事中孔憲穀奏夏聲律等皆係獲咎被議之員請將保案撤銷復諭令該部確查具奏茲據吏部兵部查明核議分別准駁具奏縣丞吳雲卿係因公降調著准其開復降一級調用處分仍留貴州補用並免繳捐復銀兩降調道員夏聲律已革同知蕭兆芬已革知縣周尙文已革副將謝世貴已革武舉羅應堂均係私罪被參之員所請開復降革處分著毋庸議向來私罪降革人員非遇異常勞績不准奏請開復林肇元於防剿匪徒尋常勞績案內率將夏聲律等違例保奏交部議處○諭軍機大臣等總理各國事務衙門奏請飭出使大臣商辦洋藥稅釐事宜一摺洋藥稅釐併徵載在烟臺條約延開數年迄未開辦迭經該衙門與英使威妥瑪商議總以咨報本國爲詞藉作延宕地步該使現已回國著派曾紀澤辦理洋藥稅釐併徵事務該大臣洞達事體向能

力持大局務將此事查照該衙門節次電兩與英外部妥爲商辦期在必成如李鴻章前議一百一十兩之數併在進口時輸納即可就此定議仍著該大臣酌度情形力與辨論其應如何酌定防弊章程設立稽徵總口之處均由該大臣與英外部商定後報明該衙門咨行南北洋大臣詳議核辦洋藥流毒多年自應設法禁止英國現有禁煙善會頗以洋藥害人爲恥該大臣如能乘機利導聯絡會紳與英外部酌議洋藥進口分年遞減專條期於逐漸設法禁止尤屬正本清源之至計并著酌量籌辦將此諭令知之

○內申 上諭 奉先嚴行禮○戊戌左宗棠奏 前因病勢增劇懇開缺回籍光緒八年十月十六日奉 上諭左宗棠著賞假三箇月安心調理無庸開缺欽此當即具摺叩謝 天恩聲明候假期屆滿再行據實自陳奉 旨知道了欽此欽遵各在案緣 臣之得病已積有歲時本難望其痊愈上年閏伍回省因積受暑濕復增新疾腰脚支離動履維艱深恐貽誤公務是以籲懇開缺調理冀蒙 福庇幸稍獲痊仍當隨時自効蓋受 恩深重義無可辭託病圖安非其志也自蒙 聖慈寬予假期三月以來延醫調治頻進補劑適江西撫 臣潘蔚赴任路過金陵爲之診脈立方據稱加進藥水自可獲効入春以後病勢尙無增加脈息照常仰蒙逾格 矜恤暫免他虞謹卽如期銷假所有假期以內應辦公事均已力疾部署幸無積壓以後照常辦理自可按日程功按兩江要政以海防爲重而治水行鹽兩大端又爲海防經

費所自出近行票運已有成效可觀據運司稟報湘鄂岸新商所領鹽票護各商承領舊商照章承認彼此無異詞已飭赴湖北督銷局銀票互交別無轉轍向之龐雜議論盡化雲烟一俟該局咨稟前來當准銷結容再另摺詳陳治吳諸策治水爲要轄境以內水利工程經上年次第施治賴淮楚諸軍之力同時合作一氣呵成計已成之工十得八九現仍雇工營作晝夜靡間弁丁齊心操作未肯告戚其仍需陸續補綴者不能不候至秋寒冬初也現據道府先後具報揚屬堤工上年所辦之周家莊西堤六安閣鐵牛灘崇家灣八堡腰鋪等處東堤又邵伯西岸至瓦窰鋪繡道工程均已完竣本年接辦馬棚灣西堤又擇修寶應氾水高郵甘江等汛東堤赤山湖工自東之道士壩起歷蟹子壩至西之麻培橋已於十二月初四日挑挖完工現接挑三汶泰淮兩河以殺下游之勢朱家山河工關繫滁州來安全椒江浦六合五屬水利得能一律疏濬農商實兩受其益而地段較長中復橫互右脊從前所以旋作旋輟者以此適宜酌帶親軍及淮揚鎮總兵章合才各營素諳工作淮軍各營相助而理尤異常勤奮踴躍爭先故能收同役同心之效其省城內外河道開工則藩司梁肇煌鹽巡道德壽會督省標及城守弁兵修築亦可次第竣工擬於正月中旬先赴赤山湖朱家山驗收工程開印後卽以次分赴下游淮揚鎮一帶周歷閱視與承辦各員面商機宜俾成水利而長江礮臺及江海防務案內續修工程並沿海沿江有應添立礮臺

者擬順便巡視詳爲部署期收未雨綢繆實效。出省後所有署中日行事件交藩司梁燾煌代拆代行。緊要者仍包封由臣行次辦理報聞。○以貴恆爲禮部左侍郎。○以王德勝爲江西南贛鎮總兵。○己亥劉恩溥奏。臣同治初年官翰林時每逢常朝日坐班王公百官到者頗多及光緒初年在御史任內查班時到者仍復不少本年正月初五日起午門前查班以爲仍是當日情形也乃候至片時未見一人到班詢諸茶役據云此禮曠誤業已二三年矣不但到班無人卽職名亦從無遞者惟有查班御史來此稍憩而去卽壇廟陪祀亦久無行禮人員等語。臣聞之甚爲駭異及初十日時享太廟臣又往查收職名投遞者僅止數條陪祀者僅有四人恭查會典內載禮部奏准常朝日滿漢文武大小官員均如期齊集坐班無故不到者題參又八旗官員如仍前疏忽到班寥寥無幾將官員過少旗分查明緣由題參又擬准常朝坐班向無定時今定冬春以辰正夏秋以卯正後時至者指參又道光五年奉上諭各衙門應預備陪祀人員理宜屆期到班以襄祀事近來查班御史不肯按名稽察參奏遂致積久生玩到班者其屬寥寥嗣後凡遇祀事如有無故不到或挾帶他人職名朦混投遞卽指名參奏等因欽此。成憲前謨均宜遵守此禮曠誤已久若不亟加整頓十數年後草茅新進必有不知坐班陪祀爲何事者且以典禮攸關之事而行禮只有數人或並無一人尤屬不成事體惟相沿曠誤已近二年勢難按名參處惟

有仰懇 天恩赦其既往微其將來 飭下禮部申明舊例通行各衙門一體遵照自奉 旨之日爲始
若再有無故不到及僅遞職名者卽由查班御史破除情面照例參辦庶大小各官皆知悚惕亦挽回泄
沓爲習之一端乎 上諭御史劉恩溥奏近來陪祀坐班各員曠誤甚多請飭整頓等語 壇 廟陪祀
及常朝坐班典禮攸關豈容任意曠誤著禮部查明舊例通行各衙門一體遵照嗣後如有無故不到著
卽由查班御史照例奏參○諭御史劉恩溥奏參給事中張觀準內務府大臣俊啟劣跡昭著請旨懲處
一摺著派廣壽會同都察院堂官按照所參各節確切查明據實具奏○張佩綸奏臣惟近半習政莫大
於停捐頗停捐已及四年而仕路猶未澄清吏治猶未整肅者何哉分發如故也保舉如故也銓選補署
之章如故也然則察濫弊之根損不急之務必自省汰冗官始矣竊觀古今治亂之理官少則俗靜官多
則政弊光武中興牧吏咸損諸葛北治蜀簡才併官常員且省況冗員哉自捐例大起士農商賈慨然有
不靖之心流弊所極名分混淆公私騷擾一國皆貴殆非治微夫一省有三五貪酷之吏賢軀臣至一彈
事足矣至聚千百昏庸貧乏之吏用之則無才去之則無罪養之則徒糜廩聚斂之則相聚怨誹其勢亦
且足以妨政臣欲別其弊敢悉陳之一宜停止分發也分發豈常捐哉停捐斷自 上意當日之部臣不
善也於是五月之限而五月之中報部捐生不知凡幾矣留分發之條而四年之中到省人員又不知

凡幾矣天下既受數十年捐輸之害而仍留分發以爲之殿辟如澤水橫流茫無畔岸水工甫畢從而兩
之有不瀾狂波湧者哉且隸各省奏停分發自收一隅而亦以隣爲壑而已近孔憲政請停過班指省兩
項誠使部議允行於吏治差立限斷而臣之區區以爲吏例選清莫收於盡停分發請 飭下部臣將捐
納勞績兩班分發即行停止並諭令疆臣不得更保留省分發以絕弊端大要東南各省二十年中必無
員少之患邊城瘠地揀發例在豈曰乏才至部院衙門班次壅滯與各省同應將事例各班分發一律議
停俾白首豐邱稍免積薪之嘆有已指分發者概令赴部踴選其例銀改獎虛銜加級可矣一宜嚴核保
舉也捐例既停分發又止士之務進取者必以保舉爲捷徑矣夫從事以摧鋒歿死爲上而敘勞乃庸文
員治水以負薪撓竹爲功而請獎不必工次甚或一案累白人少亦數十人連名比牒作福市恩此何異
於斜封墨敕哉如任道鎔林燾元均以濫保爲言者所糾然被糾者一二輕咎之員實則凡保案中任勞
者十之二三徇情者十之七八亦糾之不勝糾矣若不亟挽其流下吏生事以邀功大臣植私以濫舉將
若之何竊謂近日保舉莫重於軍營洋務請 旨嗣後各軍調遣之文員洋務差委之局員均先咨部立
案不咨者不准入保其留營不及一年留局不及三年者不准優保至河工海運循例保案均山部核定
人數年限違者駁斥仍將原保之大臣議處並請 飭下在京之王大臣遇有保案務循舊例以爲各省

構則庶倖門可塞弊竇可除矣一銓補宜裁併班次也吏部銓選條例本極簡明自捐輸開而銓法雜保舉濫而銓法更歧名色過多機緒易紊吏操其藉司不能知何論長官哉比來資敘參差選掄途邇言臣或因一人一事而建議部臣或因一人一事而改章其意亦欲補苴政治也不知銓補有例本如權衡之適均經緯之相問不統各班而深求立法之初意則必輕重倒置雜亂無章今欲釐定選法與其爰除枝節不如總攬綱條當茲捐例既停而宜刪新章復舊例抑倖示公平應請 勅令吏部將捐納勞績銓補班次逐一考核捐納不論過缺分缺勞績不論班先班後統行歸併核定銓補簡明章程擬入則例頒行人下使人知銓補並無秘籍則羣情揣測之心頓絕而部胥婪索之技漸窮一習事宜變通章程也牧令親民之官宜令實缺久任調署者不得逾十之二已蒙 特諭通飭然各省仍不能遵者一由部選人員才品多劣一由候補州縣淹滯過多督撫不得定輪委之章又恐其不能周徧也不得不定一年期滿之章在熟悉世情者恃此爲均平之道而不諳吏治者更推此爲時措之宜不知此實最弊之政也夫州縣需次經年幸而委署不但累載親朋之債藉此補償卽終身衣食之資亦欲藉此取給限以一年彼既無扶風滿歲之真除卽皆存京兆五日之觀望懦者苟且以求無事黠者多方以肆貪婪在南則漕糧急徵而虧折以入交代在北則差徭苛斂作墊款以便抵償終日孜孜惟利是視家屬僕從刻日取盈更

何暇計及風俗政教哉上耗國下耗民甚至吏代賴煩供應無藝亦且耗及胥吏夫至耗及胥吏而官箴
蕩然矣而疆吏方謂然曰此調劑貧民之良法也不亦曰乎應請 飭下各省凡署事人員不准再有
一年期滿之限平庸者隨時撤任循良者迎歲仍留並將各州縣署事日期照例按季咨奏山軍機處吏
部察核如仍有一年期滿者將督撫藩司懲處管主臬之有言官省事久中才猶足有成誠至論也說者
謂署事亦聽久任則後來不免向隅然爲官擇人本非爲人擇官資力困乏投効者聽亦何取照仁子議
哉以上四事臣意在剔除積弊澄敘官方而慎名器謀才能培元氣之效亦隱寓其間其不便者惟天下
猥雜之人流兩部狡黠之胥吏而已夫取士本非一途入粟納資古今類多奇士臣議行則有才者足以
自見而妄分者亦足以自存第苛於陳進苟取之徒非肯扣納而盡斥之也至部吏窟穴叢奸必且藉端
煽弊而吏戶兩部近皆稱整頓諸大臣亦當有挽回風氣修明治典之心而必不爲胥吏所惑矣伏懇
飭下吏部戶部妥議具奏請 旨施行俾 朝廷停扣之盛美明白於天下 上諭著都察院左副都御
史張佩綸奏通籌停扣晉後之法請旨飭議一摺所陳停止分發嚴核保舉銓補裁併班次署事變通章
程各條著該部議奏○諭宗人府府丞總理各國事務衙門章京吳廷芬著在該衙門大臣上行走○諭
已革兵部左侍郎胡瑞瀾已革山西布政使林壽圖已革安徽布政使傅慶貽均著來京交吏部帶領引

見○梁俊奏方今廣開言路百責各官皆思及時建白以備採擇臣識淺才疏幾於無可獻替然當此虛懷納諫之時既不敢苛於吹求亦不敢安於緘默謹就時政之要管見所及者敬爲我 皇太后 皇上陳之一曰恤災賑向來蠲免錢糧小民先期輸官者准其流抵次年正賦則例所載防弊本極周詳乃光緒三四年間豫省奇災經 欽派崇綺邵亨豫馳往查辦其擬奏摺內聲明被災最重地方有錢糧扣數全完者有完至七八分者追次年開徵州縣官催令民間照舊完納不准扣抵此臣之所切知者也去年東南數省水災經各該督撫奏請蠲緩錢糧無不仰邀 恩准誠恐不肖官吏仍前侵蝕致小民踴躍輸將盡歸中飽尙復成何事體查同治三年戶部奏請申明定例嚴防弊端一摺曾經奉 旨明白宣示無論有無流抵字樣厥例維均通行在案應請 飭諭戶部嗣後遇有蠲免年分即將同治三年奏奉 恩旨於先行將該稿內全行恭錄不准以等因二字省文俾小民周知流抵次年正賦係屬定例庶災民免重徵之苦而官使不致捏作民欠矣一曰懲濫保去年十一月間有內外大臣保薦人才之 命而又嚴諭不得瞻徇情面徒探虛聲仰見 聖主於求賢若渴之時仍寓嚴杜倖進之意曷勝欽佩然臣猶不無過慮者方今大弊皆由賞濫而罰輕徒以空言 誥誡斷難轉移風氣如左宗棠之誤保王詩正李瀚章之誤保楊宗濂曾國荃之誤保王定安其他之未經發覺者更不知凡幾矣乃濫保匪人都該降調者

又往往加三改爲革留是信實而不能必謂臣恐徇私植黨之徒皆存輕視朝廷之心 上諭之所云不得瞻徇情面者仍當視爲具文將何以振飭紀綱風勵天下乎考宋臣司馬光奏立十科取士法授職後所賜誥命仍具舉主姓名其人奉職無狀者坐罪夫以有宋名儒之司馬光尙議舉主之罰則我朝濫保降調之例豈非千古用人大法乎應請再 諭內外大臣必真知灼見方准列入薦牘倘所保非人別經發覺定將原保大臣嚴加懲處毋稍 加恩庶內外大臣知 寬典不能倖邀自必虛心採訪實心考驗而所保乃皆真才矣 上諭御史梁俊奏敬陳管見一摺向來地方遇有災歉各省督撫奏請蠲緩錢糧無不立沛恩施原所以體卹民艱免致失所乃近來於蠲免錢糧年分民間先期輸官者迫次年開征該地方官仍令照舊完納不准流抵次年正賦致小民輸將盡蹙中飽實屬大千例禁藩戶部嗣後遇有蠲免年分即將同治三年所奉 諭旨於先行騰黃稿內全行恭錄俾災黎周知定例以杜重征國家用人務拔真才迭經諭令內外大臣保薦不得瞻徇情面徒採虛聲必灼見真知方准列入薦牘朝廷庶收得人之效嗣後如有所保非人別經發覺定將原保之員嚴加懲處其各懷遵○辛丑諭 東陵營房工程一案據景瑞明白回奏當諭令伯彥訥謨帖圖敬銘提集前後各案嚴切根究茲據奏稱訊據該監將監修及商人等所供各節與景瑞回奏種種不符現據該緝供稱上年十二月間因掛匾工程景瑞令

誌綿先行湊交銀兩當經面交景瑞銀條一千兩商人收過等語此案工程銀兩現經查出虧短鉅量
瑞前奏各節諸多不符應澈底根究以成信讞正黃旗滿洲副都統景瑞著先行解任卽前赴東陵
聽候質訊○甲辰諭都察院奏遵旨整肅鹽綱一摺據轉吏科掌印給事中戈站老而務得頓改清操戶
科給事中周盤澍嗜好已深頗招物議寧浙江道御史英俊與庫書時相往來銖銖毫職掌福建道御史
劉治平身體軟弱病疾難除福建道御史伊里布前巡城時收取陋規聲名頗劣寧廣東道御史徐克剛
此匪人等語既據該堂官訪察確鑿應卽予以懲處其所參姑免深究戈站周盤澍英俊劉治平伊里
布徐克剛均著勒令休致以肅官方○崇綸奏查奉省無關風水產煤處所經客戶報官開採交納稅課
惟各密挖掘煤斤所用人工每多匪類潛跡其間實爲地方隱患卽如遼陽州境內東山本溪湖一帶密
洞從前巨盜藏發等潛匿多年不時糾夥肆劫是其明徵煤匪爲害地方各屬皆然而遼陽距省較近蒙
族強宗更多包庇宜設法鈴制以期消患未萌現經奴才派兵駐巡並委員設局抽收煤釐藉以稽查
匪類核計煤價高下每二十斤約抽制錢一二文不等於民間日用略無所損既可鎮靜地方亦可稍裨
練餉其各屬採煤處所並擬一律照辦是於籌款之中實寓弭患之意一俟稍有成效量入練餉進款項
下核實造報仍照章內扣一五經費以資辦公下都知之○丙午以張之洞爲刑部尙書彭玉麟爲兵部

尙書○命徐桐爲國史館正總裁○諭軍機大臣刑部尙書潘祖蔭在南書房行走二十餘年勤勞匪懈
伊父四品卿銜前任內閣侍讀潘曾綬迎養在京精神素健茲聞遠逝軫惻殊深著加恩追贈三品卿銜
並賞銀二千兩經理喪事由旗儲司給發以示優卹○諭上年順天直隸各屬災區卽經降旨蠲緩糧租
並由該署督籌撥銀兩動用倉穀分別散放俾資接濟惟念文安大城任邱獻縣雄縣高陽安平安州新
城靜海蠡縣博野等處積水未消麥未普種及深州東鹿地震被災村莊小民困苦情形朝廷實深軫繫
亟應特沛恩施量加撫卹著撥給本年採運漕米二萬石卽在天津就近截撥張樹鑿等詳查災區輕重
及時分撥核實散放並以工代賑其隨漕船耗倉米石及運船船價等項並飭解交直隸津貼賑需該
署督等卽督飭所屬認真經理務使實惠及民毋任絲毫弊混用副體卹民艱至意○丁未吏部奏內閣
鈔出光緒八年十二月二十七日奉 上諭給事中黃元善奏各省據調首府首縣請嚴定濫保處分等
語著吏部議奏欽此欽遵到部查此案工科給事中黃元善奏省會首府首邑定例先用正途出身人員
調補近日各省大吏以正途不宜爲詞請以各項人員據調自係爲得人起見惟督撫保舉各項人員陞
調旣已逾格將來獲咎亦應加等請將保非正途人員越次以各項人員列保者如有貪酷劣跡照保正
途不實之例再行嚴定章程加等議處欽奉 諭旨著吏部議奏查省會首府首縣繁劇要缺非據調得

人難期治理如所保之員犯有貪酷劣跡自應將原保之上司照濫舉匪人例議處若保非正途人員犯有貪酷劣跡該給事中請嚴定章程加等議處自係爲慎重要缺嚴杜濫保起見臣等公同酌核應請嗣後省會首府首縣該上司若保非正途人員越次以各項人員列保者如果所保之員犯此貪酷劣跡別經發覺即將原保之上司於濫舉匪人降三級調用私罪例上加等議以降三級調用如此嚴定章程庶要缺不至濫保而官方益昭澄敘矣如蒙 俞允臣部即纂入例冊永遠遵行並通行各該督撫遵照得旨如所議行○庚戌以周德潤爲內閣學士○以懷塔布爲都察院左副都御史○曾國荃奏廣東瓊州府屬崖萬二州黎匪先經署瓊州鎮總兵劉成元署雷瓊道劉鎮楚分道進攻萬州一路業經劉鎮楚督軍攻剿全境已定崖州一路迄未得手各營弁勇感受瘴癘致疾經臣裕寬在兼署總督任內於光緒八年五月十九日具摺奏明請俟秋涼再行相機進剿並請將調度無方之署瓊州鎮總兵事三江協副將劉成元暫行革職示懲仍責令隨同劉鎮楚迅速立功以觀後效在案隨飭據劉鎮楚將各營兵勇分別撤留駐紮崖州三亞地方扼要嚴防擬俟天氣晴爽再行添募勁旅馳往剿辦臣國荃抵任後先後接據劉鎮楚稟報各營兵勇已調募齊集派員管帶於八月中旬親督起程由萬州取道前進沿途將各營崗分別拊循九月初九日行抵三亞地方連日確探匪情察看形勢該逆符亞對踞守抱寨匪巢堅固不

出該處距三亞僅三十里路徑紛歧極爲險峻我軍須由水脚抱升以次而進方能直搗巢穴其夥黨如大茅崗之李亞吹藍練崗之譚亞吉羅朋村之吉文香等均爲助逆匪犯相距抱寨匪巢或三十里或二十里不等非步步爲營旁敲側擊難免牽掣抄襲之虞二十三日我軍計議已定正擬拔隊啟行詎該匪已豫有準備將沿途要隘挖城深坑密釘竹籤阻我進兵之路當飭各營兵勇開道前進派參將劉文成革員劉成元管帶鎮海營進紮抱升候選道劉錫勳管帶鎮南營已革記名提督前雲南鎮雄營參將李文才管帶鎮瓊營並紮水脚地方彼此互相聯絡以便分道攻取副將周傳宗督帶親兵在後接應一面密諭黎崗譚亞吉等遵照如能反戈殺賊將匪首符亞對網送者准予免罪論功九月二十七日約會各營同時並進環逼賊巢該匪憑險拒守施放鎗礮子落如雨我軍奮勇攻擊互有損傷該處樹林叢密前後皆設木卡險固異常該匪先於兩旁樹林內埋伏數十人劉鎮楚當防李文才劉成元等分路包抄砍伐樹木鼓勇而前兩旁樹林內之賊悉時潰亂劉錫勳見賊已驚竄卽施放噴筒火箭督隊力攻都司李勝楚守備黃祥德各督勁勇砍卡先登各勇繼進匪衆亂竄我軍跟蹤追殺因前途崎嶇未便窮追當行收隊是役也斃匪數十名我軍兵勇陣亡二名受傷六名回營後詢諸土人謂該匪尙有一卡三卡未破其三卡距抱寨僅止里餘當卽傳令各營乘勝進攻詎連日風雨大作山水陡漲營內水深數尺不能進

兵概令移紮附近土村休息十月初一日天氣晴霽各營兵勇仍進紮原處劉鎮楚以大烟抱丑牛黃村荔枝嶺一帶爲抱寨匪巢門戶且與符亞對互相犄角必須剪其羽翼庶免彼擊此應初六日黎明親督各軍分路進搗該匪於山上瞭見官軍逼近登時吶喊吹角拒守甚力劉錫勳李文才督隊從左路上山砍卡而入將巢內房屋概行焚燬匪衆奔潰值劉成元劉文成從右路擁軍繼進兩面夾擊聲應山谷餘匪紛紛逃竄我軍率衆搜捕斃匪無數並將山上匪巢一律焚燬次日大烟匪首林亞馬董亞是抱丑匪首李亞螺均來營乞恩求撫劉鎮楚曉以利害示以血誠並令約束子弟不准再行從賊各造戶口清冊呈繳軍械網送要匪林亞馬等均各俯首聽命此外各寨崗亦聞風懾惕陸續出求招撫劉鎮楚仍前慰諭令各回崗安業其未出投誠者僅抱寨大茅藍練三處劉鎮楚以匪勢既孤不難迅圖攻拔惟崗內山深林密誠恐元凶漏網更費躊躇似不若先擒首惡再剿巢穴方爲計出萬全隨選派黎中爲該逆素所親信之符亞見林亞馬帶同親兵數人密授機宜令其前往設法誘擒十八日逆首符亞對果被誘致來營接見之下委係正身無譌當即撥勇嚴加看守一面派隨營候補典史李光斗由輪船先行押解赴省因屬紳民無不同聲稱快隨飭各營分撥六成隊伍馳抵抱寨搜捕夥黨以絕根株所有巢內茅屋概行拆毀抱寨一處已無匪蹤二十六日據報符亞對夥黨千餘人在檳榔園附近聚集劉鎮楚督飭各營

整隊前往該匪見官軍驟至亡命奔逃我軍四面掩殺斃匪數十名十一月初二日探得該匪黨糾約崖州西黎陵水感恩兩縣倖聚共四千餘人併力來抗劉鎮楚分飭各營嚴陣以待布置甫定該匪果分三股出擾一股約二千餘人由檳榔園田中而來劉文成李渭培揮軍接戰鎗礮齊施匪亦抵死抗拒劉鎮楚止督親兵前往助剿復有另股匪徒千餘人由四曲嶺衝突而出劉錫勳攔頭迎擊其時檳榔園山內匪眾千餘人亦蜂擁前來接應李文才督隊截剿鏖戰兩時之久我軍皆奮不顧身勇氣百倍適游擊王文德當先鎗斃騎馬聚匪一名檳榔園田中之匪因之大敗各軍乘勝奮擊四曲嶺及檳榔園山內之匪同時奔潰我軍進剿十餘里斃匪數百名生擒二十六名割取首級四十二顆奪獲鎗礮器械無算生擒各匪卽於訊明後正法我軍僅鎮南營花翎守備蕭仁良身受鎗傷至晚回營身故各營勇丁受傷者七名該匪所糾黨與自被剿後均各連夜散回初六日監練大茅抱寨三處聚眾偕同各紳士來營乞恩劉鎮楚念渠魁就擒誓爲撫慰一面出示曉諭以安降黎之心並督同署崖州知州戴嘉齡妥籌善後分設總管責成隨時約束勒令先後網送要匪符亞新等二十五名均係焚劫殺人拒捕戕官匪犯卽在軍前正法並據呈繳鎗礮器械六百餘件全境一律肅清等情併據委員將匪首符亞對押解到省飭據臬司審據供認接充黎崗頭目疊次糾黨劫擄焚殺拒敵官兵等情不諱經臣等覆勘明確恭請 王命先行

正法傳首犯事地方懸竿梟示以昭炯戒伏查崖州黎匪首逆符亞對爲積年巨患負險抗拒漏網稽誅已非一日劉鎮楚於剿平萬州黎匪後督軍進剿親冒矢石備歷艱辛各將弁亦同心戮力冒險衝鋒卒使元凶授首黎境肅清洵屬調度有方謀勇兼備所有在事出力人等自宜擇尤先行酌保數員俾昭激勸相應請 旨將花翎二品頂戴署廣東雷州府事補用道劉鎮楚交部從優議敘選用道劉錫勳請以本班分發省分歸候補班前儘先補用並 賞戴花翎藍翎副將蕭裔增請仍以副將留粵儘先補用並 賞換花翎花翎參將銜督標儘先補用都司李渭培請免補都司以游擊仍留督標儘先補用藍翎從九品周福峨請免補從九品以藍經歷留於廣東歸軍功班儘先補用以勵有功至花翎守備蕭仁良舊勇捐驅深堪憫恤並請 敕部照例議卹以慰忠魂下部議奏○辛亥諭李鴻章奏請賞假回籍營葬一摺覽奏情詞迫切出於至誠不得不俯如所請李鴻章著賞假兩箇月回籍營葬假滿後即回署任川資倚畀辦理北洋通商事務大臣著張樹聲暫行署理○曾鈺奏各各部題覆事件均以外省具題奉 旨由六科鈔出到部之日起各視其部務之繁簡予以例限乾隆十四年所定尙有二十日三十日者至乾隆三十二年復經奏定則皆在四五十日之外定限本極寬裕不難依限具題乃日久懈弛竟視例限爲具文往往藉端行查任意耽延弊端遂致百出其尤甚者則莫如會議具題之件奴才知之最確者如工

部所辦之河銀考成一案自河道總督造冊題報奉到科鈔後由工部主稿會同吏戶兵等部核議綜計
例限不過百餘日卽應具題乃近年以來推諉稽延必須逾至二三年之久其中捺攔最著者則莫如吏
部動藉行查事故往返遷延始於會審考成終於查改事故計題覆一案而稿件爲吏部所壓每及二年
積久相沿更何從計以例限夫河道總督題報之案以旨考成不過遲河一道所屬府州縣衛以旨錢糧
不過河銀一款辦理尙如此遲延若推而至戶部之錢漕刑部之緝捕關繫天下州縣考成者其推諉延
擱又當何如至各部自行題擬之件不關會議無可推諉則必藉端行查拖延時日今日查一事明日查
一人此處之覆文未回彼處之查文又到輾轉支離蔓延不已必使此事決不能明此稿決不能定雖該
管堂司官亦無可如何然後詐索刁難恣爲弊習官外省者每言部中書吏專人兩致各省地方官指案
要求重賄竟有往返數四而本案尙未題定者亦有不遂所求竟以考成去官者論其事不過遲誤遷延
窮其弊則講張爲幻莫可究詰查題本定限各部例文所載詳略不同最詳者莫如臺規內六科道掌註
銷各條其中辦稿繕本查改行文定限一一分明瞭如指掌惟行查未經定有次數所以胥吏作奸至於
如此相應請 旨飭下各部大臣督飭所屬於應題事件認真稽核依限辦結不得稍有遷延倘有必須
行查之處應將事由彙齊分查各衙門所有一案之內只准行查一次不得陸續增添並將咨覆例限敘

入行查文內如有遲誤卽照例隨本附參並請飭下都察院由六科將臺規內註銷各條鈔錄移會各部俾使遵辦如再仍前玩愒有意遲延卽由註銷之科道據實糾參至其題奉旨後是否依限行文亦應由各部大臣查照道光二十五年御史張錫庚條奏請核對文簿以免積壓一摺奉旨議定章程認真辦理上諭御史曾鈺奏請申明題本限期並吏部書吏勾結情弊刑部本房題稿遲滯各摺片據情各部辦理題本藉端行查弊竇自出工部所辦河銀考成一案遲至三年之久始行具題吏部書吏與通政司書吏內閣供事轉輾勾結壟斷外官缺本顛倒影射刑部本房承辦具題任意沉滯各省拘繫輕罪竟有累年不奉部覆等語各衙門辦理題本均有定限並有都察院隨時稽核註銷立法本極周詳若如該御史所奏積壓遲延殊屬不成事體著該衙門申明定例嚴剔弊端應如何設法稽查各就定章實力奉行務須依限具題以除積弊嗣後如有積壓卽將承辦之員嚴行參處○諭御史曾鈺奏風聞禁城添安寶匣內裝金銀等物均用銅錫贗充願字樣例用銅板鍍金現係本領貼金請飭查驗等語著工部堂官會同內務府大臣確切查明據實具奏○諭廣壽張之萬奏遵查大臣參款據實覆奏一摺據稱志和被參各節或事出有因或查無其事惟上年七月後因病請假數次未能常川蒞署到署時降輿處所未能如儀都察院候補經歷鄭德寬及鄭六曾照料其母舅張瑞興所開裕順木廠原參係張福乞養

子查無確據該尙書前允崇文門監督時曾派鄭德寬爲委員又派稽查驗貨等語志和歸差有年近來體弱多病著卽開缺鄭德寬以市僧捐納官職種植不安本分著卽行革職○諭廣壽等奏遵查給事中張觀準等參欵請將該給事中解任一摺戶科掌印給事中張觀準著先行解任聽候傳訊

二月壬子朔予故兩江總督陶澍欽差大臣著廣西巡撫林則徐於江甯省城合建專祠○甲寅諭軍機大臣等昨據岑毓英杜瑞聯奏法越交涉一事遵旨豫籌一摺近聞法國欲更前議並欲將該使寶海撤回彼族反復無常惟當持以鎮靜嚴申儆備已諭令岑毓英杜瑞聯倪文蔚將關外各營擇要扼紮妥籌防範前派提督吳全美統帶輪船水師在廣東廉瓊一帶駐紮巡防現在法越之事未定著會同岑裕寬飭令吳全美認真操防仍照前巡哨以壯聲勢○以瑞聯爲兵部尙書麟書爲工部尙書額勒和布爲理藩院尙書○以福錕爲戶部右侍郎兼管錢法堂事務貴恆爲刑部右侍郎嵩申爲禮部左侍郎○以烏拉喜崇阿爲正白旗蒙古都統○以恩福爲熱河都統○乙卯左宗棠奏淮南引鹽前准人奏加鄂湘新票十五萬引原以稽諸額短缺不前數十年來未經規復而新商踴躍爭先捐輸巨款又於國計不無裨益是以一面奏請加額一面咨商川楚兩省將久假未歸之引地一律歸還川楚督臣如果不分畛域復准引地助淮緝私前次准加之十五萬引暢銷於荆宜五府二州淮課由此充盈商竈由此繁富乾

降嘉慶之盛規未始不可復觀於今日及四川督臣丁寶楨僅允每月減讓一二百引尙屬空言並非實事湖廣督臣涂宗瀛一意祖護川鹽爭斷不致少之餉項忘必不可廢之成規以致引地經絕未復新鹽無路拓銷商情畏阻上煩宸廑其咎固不在增引之驟而在復岸之難也明矣接准部咨以引地未能全復速加三百票恐不能接輪銷竣不若由漸而來新商已繳銀六十萬兩應准加票六十張倘新商不願承領應令舊商認繳銀六十萬兩發還新商等語是辦理掣肘情形部臣亦已洞悉茲據兩淮運司孫翼謀署准揚道徐文遠具詳新商賀全福等三十四商以十五萬引減為三萬引每票繳票費一萬兩衆商意見參差無力承運稟請退票由司另招股商和致祥等接辦飭令局員傳同面詢一退一認皆出情願由和致祥等繳銀六十萬兩歸還賀全福另給和致祥等循環三萬引以二萬引歸鄂以一萬引歸湘分別綱分挨次給運是舊引既不至占礙新票可按輪銷售商情帖服衆論翕然核與部臣收銀六十萬加票六十張之議適相符合而賀全福之票既經退出從前之謠議紛紜亦已不煩辨論而自解矣惟賀全福等前次繳捐後經臣奏明一面收銀一面辦運且恐引地一復到處需鹽長江路遠不能不先行起運此次接到部文臣比飭運司於奉文日截數據報運出鹽七十九票合三萬九千五百引已運之鹽有到岸銷訖者有早經開江者均祇准一次爲止此後歸和致祥循環轉運下戶部知之○張之洞奏督

省二十年前稀有盜案非無盜也本省民情謹弱不能爲盜穢年殷盛之時聚落稠密屋宇堅完游民頗少村規甚嚴流亡亦不容棲止匪類更無敢窩留外來之盜既無引線又無窩家自然無從託足自同治年間設防河之軍客勇數十營紛紜累年而後罷以後屢駐大枝營勇遣者不盡還鄉於是皆有游勇過外七驢土地荒闕亡命潛蹤自新疆用兵大軍出塞入塞皆以歸綏爲轉輸屯駐之場募民萃焉於是皆有馬賊自丁戊挫饑戶口大減墟落蕭條村規稍弛貧民誘於小利漸有句賊窩匪之事此端一開趨之若鶩於是皆有外來糾夥劫盜比年日益橫肆光緒五年通省劫案凡四十九起六年劫案凡二十九起七年劫案凡五十七起本年十月以前劫案凡二十九起最甚者莫如去年三月蒲縣黑龍關有盜匪直入汛署劫奪獲犯脫殺把總王標一案今年十月泰義縣有盜匪多人白晝入城開放洋鎗劫奪錢鋪乘門逃逸一案解州有盜匪十三人踰城而入開放洋鎗劫奪錢鋪旋於五日內連劫陝豫境內拒傷弁兵一案各盜大率皆直東豫三省界上游匪平日習充賣布賣帶小販分股入境混匿城市伺便而發蓋直豫兵力較壯未能大逞稔知督省兵單而民懦輾轉招引踵接而來此據各盜供詞與諸路採訪一一相同加以今年大青山後荒旱流民南徙就食者膺集歸綏多方彈壓時虞滋事節次嚴檄通省文武防營將領講求緝捕協力擒拏調派馬步兵勇於南北路分段梭巡惟是兵役之力僅能及於城汛要衝非

集勸民間自謀守衛不可因飭通省地方官力行保甲勸諭居民聯爲守助約查習俗每一村爲一社若一村有三三公廟則一村爲二三社各有長村民悉聽指揮因令卽以社長爲約長仿古人連村招鼓之法令鳴鐘鳴鑼相聞平日則自清窩匪聞警則互相救援協助兵役攔截追捕優懸賞格詳定條規不令造冊點名以免吏胥滋擾如將來辦有成效匪安民其勸辦有効之地方官捕獲巨盜尤爲出力之約長可否由部查明奏懇 恩施酌予獎勵庶可以鼓民氣之積極輔官力之不周惟查歷任撫卹奏定章程皆以南北路盜風未息迭請將就地正法章程懇免停止而查辦過成案於糾夥持械搶劫兇暴衆著者亦多有酌量情形卽比照土匪馬賊游勇辦理實所以力懲奸宄俯順輿情本年四月准刑部咨酌議就地正法章程原奏內稱各省實係土匪馬賊曾匪游勇案情重大並形同叛逆之犯均著暫准就地正法隨時具奏錄供咨部其餘尋常盜案統限一年一律規復舊制備實係距省爲遠地方長途恐有疏虞將犯解赴該管巡道訊明詳由督撫分別題奏等因查核所指六項既見執法之慎仍示戢暴之嚴極爲明允惟原議語意渾括不得不再請明晰定章以資遵守蓋劫盜中多有五方游匪猝然聚會糾夥多人各執持刀械火鎗出沒各省界上攔路搶掠迭劫多次逞兇傷人公然拒捕復有竊盜招匪作綫分賊謂之馬賊則仍係徒行謂之游勇則未著號掛謂之會匪則不肯供出會黨姓名謂之土匪則非籍隸本

境而其爲害則較之馬賊游勇會匪土匪備止二三人者而有甚焉其人數既多器械既利則擒獲不易其鄉賢既難則追捕無蹤卽如目前解州盜案幸而兵役促之河干始克陸續全獲若在原必已大半竄逸而悍盜兼爲富主之姜汰榮就縛以後依然遁去歸綏道溫圻齊等處盜案賴有大隊樹軍防營窮搜山後始獲數名然盜首張均等尙未弋獲若羈禁解勘既恐難免疏虞而不在劫所行誅亦不足以昭炯戒擬請嗣後省盜案如有執持刀械火鎗者衆至三人以上者糾劫三次者糾劫致傷事主者拒捕傷人者入城行劫賊數較多者高緝分賊至二次者有一於此卽由該州縣錄供通稟撫臣查核情形批飭該管道府前往提訊供證確實暫准就地正法如距本管道府較遠者由省派委道府大員前往提訊供證確實亦卽就地正法隨時奏咨俟盜風止息再復舊制緣此七項實與部議馬賊游勇會匪土匪案情重大諸條情節相等則辦法亦應一律似不宜過事拘牽遂致因噎廢食如不在部議原定諸條及此七項之內者仍照例解勘其尋常盜案而距省爲遠者仍照此次部章辦理如此明列條目則奸暴既可知儆而州縣亦不致含糊遷就上下其手與部章防濫殺重民命之意正相符合抑或遇有糾夥持械搶劫兇暴聚著者暫准酌量情形卽比照土匪馬賊游勇一律辦理無庸分別條目統俟部臣核議夫弭亂於既兆不如防患於未然以省近輔臨邊而盜風日熾若不極力懲遏則南路爲他省匪徒所垂涎皆

將以晉爲壘北路挽引如漢藩部雜居尤多隱患養癰伏莽實懷焉竊謂撫民則以煦妪堯不爲治
懲亂民則以剛斷疾速爲功地方官果能於訟獄賦斂存愷悌之心不以敲撲拖累使民惴惴困斃於無形
則一省之中一年之內全活者已不下數百人正不在稍緩此數十強暴匪徒之死而後爲慎重民命
也下部議奏○丙辰戶部奏光緒八年十二月二十三奉 上諭給事中孔憲毅奏捐納人員過班指
省兩項請飭停止等語著戶部議奏欽此遵由內閣鈔出到部查原奏內稱捐例已停尙有二弊一曰過
班一曰指省各隨其人之私弊難枚舉況分發爲 國家常例指省則一時權宜今以權宜混入常例於
定章不合至過班一項徒令佐雜捐百餘金而正印矣州縣捐數百金而道府矣生覲覲之心敢攀援之
徑其則於原省中過班而小可加大於過班後指省又此可之彼二弊循環而應停止等語臣等伏查光
緒五年正月二十一日臣部具奏停捐一摺並將現行常例條款繕單恭呈 御覽內開常例祇載分發
銀數其指省銀數係同治五年纂入此後分發指省應令照例定實銀辦理等語當經奉 旨允准遵照
施行在案自停捐至今四年赴部庫照例定實銀報捐指省人員每年不過十餘名捐數寥寥收之無裨
於庫款停之可以杜擇地而仕及棄此適彼之弊該給事中請停止指省自係爲嚴防流弊起見應請自
此次諭擬奉 旨之日起卽行停止其從前遵辦例例在各省報捐指省人員凡係停捐限內到部已經

奏咨議覆者仍照舊辦理至過班一項光緒五年四月十三日臣部具奏常捐事宜摺內單開報捐免選免補本班一項與常例內捐離任相因此項人員本有實在官階應附入常例捐離任條下辦理以後悉令呈交實銀由部庫兌收等因亦經奉旨允准遵照施行在案臣等伏查候補候選人員復經勞績保舉俟選缺後以何項陞階補用或補缺後以何項陞階補用報捐免選免補本班歸所保陞階補用故謂之過班此項人員即使不捐過班亦在該省候補其候選者得缺後捐離任亦在該省候補准其捐免選免補本班既與補清仕途之意不背亦與常例內現任應陞人員捐離任相同且停捐後由部庫呈交實銀縣丞過班知縣實銀二千八百六十二兩知縣過班直隸州知州實銀一千五百十二兩知州過班知府實銀二千三百七十六兩知府過班道員實銀二千五百九十二兩該給事中所謂佐雜捐百餘金而正印州縣捐數百金而府道是但知從前外捐減成之數少而不知近來部捐實銀之數多似於庫款無少補而於仕途亦無妨礙臣等公同商酌意見相同所請停止過班之說應毋庸議仍照舊章辦理至該給事中所稱生覬覦之心啟撻援之徑此種風氣無論過班未過班各省恐皆不免應請飭下各省督撫於屬員認真考察倘有此等覬覦撻援之徒立即據實展參以挽頹風而肅仕習至原奏所稱迴避一項應一併不准報捐指省以昭畫一再署副都御史張佩綸條陳停止分發一摺應由吏部主稿會同

臣部另行議覆具奏得 旨如所議行○丁巳英煦奏八旗之設二百餘年其始人心樸厚立法周詳該管大臣亦皆實心任事不容絲毫弊端所以乾隆嘉慶之時八旗兵丁夙稱勁旅至今日而壞法亂紀其弊不可勝言謹就奴才見聞所及臚列四條爲我 皇太后 皇上陳之一混入旗籍宜清查也八旗年終編立戶口冊檔原以杜虛開人口冒食錢糧之弊尙未有慮及民人混入者茲則八旗兵丁半屬民人充數詢以姓氏而不知卽以清語而不曉推原其故皆由各旗民役編立戶口冊檔將其子弟漸漸混入捏稱某婦婦之子或某婦婦之孫其後遂報捐報考儼然以八旗世僕自居聞有其父尙爲某民役其子卽爲某旗官兵若不澈底清查勢必至無業游民冒充功勳之後將來或受 恩封或襲官爵流弊伊於胡底擬請該管大臣認真清查並責成八旗族長按月呈報有無混入情事倘所報不實官則廢參兵則重懲並將混入之人咨部治罪庶旗籍自清矣一侵扣俸餉宜稽核也自庫欸支絀俸餉減成官員兵丁已形拮据而俸餉房承辦人等又復假庫虧以爲名層層剝削甚至俸銀一分短少數兩餉銀一分短少數錢卽有一二整頓旗務大臣遂支領俸餉之日進署回平而承辦人等詭譎多端預行按應領數目實足平每另備一分以爲回平地步迨至官員兵丁支領入手仍是虧短甚多該管大臣亦無從知其底蘊八旗官員兵丁幾何而不困苦耶擬請該管大臣認真稽核遇有本旗支領俸餉之日親身進署抽查並

令參佐領等官監放倘有前項弊端卽行參辦則俸餉自實領實發矣一頂替挑缺宜懲辦也八旗挑補兵缺向章領催以識字爲上馬甲以中箭爲優非逾十六歲均不得入選乃近來應挑人等多因年歲不符以及文理不明弓馬不熟之故遂覓他人頂替一經補缺卽將應領庫銀作爲酬謝之費參佐領等亦扶同隱匿瞻徇私情若不從嚴懲辦恐相沿已久八旗兵丁無一成材豈不虛糜帑餉乎擬請該管大臣每遇挑補兵缺令參佐領出具並無頂替印結先行呈遞仍親身向本兵盤詰倘年歲三代與牌冊不符卽將頂替人等咨部治罪參佐領等官指名嚴參庶兵皆適用餉不虛糜矣一私賣甲米宜禁止也八旗兵丁按期支領甲米原爲養家口計乃近日起倉參領等官先向該倉花戶串通舞弊任令攪雜土塊不堪食用米局商人亦得高下其手互相爭買致使領米右各兵甘心售賣無可如何參領花戶等遂從中漁利彼此均分俗呼之謂成事夫成事之弊八旗皆然右翼尤甚若不嚴行禁止恐 朝廷養兵丁之意轉屬有名無實擬請該管大臣親身赴倉督飭參領等向該倉文領潔淨之米分放各兵毋任私自變價倘有攪雜土塊不堪食用等情卽將該倉花戶赴倉參領等從嚴參辦似於兵食不爲無益矣以上四條皆八旗積久之弊奴才平日確有見聞可否請 旨飭下都統認真盤剏妥議具奏 上諭大理寺卿英照奏請飭整頓旗務一摺八旗規制本極周詳乃相沿日久積弊叢生亟應認真整飭所奏混入旗籍

使扣俸餉頂替挑缺私賣甲米等弊應如何設法整頓蘇州之處著八旗都統嚴定章程妥議具奏○戊午祭社 稷壇遣世鐸代行禮○諭廣壽等奏遵查給事中張觀準內務府大臣俊啟被參各款據實覆奏一摺據辦張觀準曾向俊啟借銀二千兩俊啟並未借給呈出往還原信均屬相符惟張觀準函內微詞恫喝原奏謂其意存要挾實非無據俊啟廣建房屋侈於白奉請旨分別懲處等語張觀準職居風憲輒向俊啟借貸多金意存恫喝實屬有玷臺班著即行革職俊啟諸事不知謹飭致招物議著開去總管內務府大臣差使並著交部議處○己未頒給江蘇儀徵縣 城隍廟匾額○庚申以馬蘭鎮兵變革總兵桂昂職以文秀爲馬蘭鎮總兵○辛酉朔 日於東郊○諭戶部奏雲南銅運改歸舊道經過四川湖北兩省請派大員經理一摺雲南解運京銅經過各省前經派員經理現據該部奏自五起二批爲始改由四川湖北運解所有經過各省除江蘇直隸仍遵前旨辦理外四川著派鹿傳霖湖北著派卞德標卽責成各該員嚴飭委員及沿途各地方文武員弁認真稽查催趲護送前進該運員倘有無故遲遲及盜竄短少等弊詳報該督撫嚴行參辦如有應需水師照料之處卽由派出之員詳咨該督撫及水師提督調遣至此派員之員遇有升調事故卽令接任之員遵辦○壬戌以阿克丹爲內閣學士○甲子岑毓英奏滇省各標鎮協營現設制兵五成共合戰兵九千六百七十一名守兵七千八百六十一名歲

支官俸兵餉共合銀四十一萬數千兩爲數甚鉅復另設立練軍而緝捕巡防尙有疏虞推原其故皆由平日不能認真操練縱容各弁浮冒名糧任用兵丁藉口防所塘汛堆卡零星散住以致無將左右罕有得力兵丁如上年昭通府城之變可爲殷鑒等伏念兵以衛民不可一日無備茲與藩司唐炯再四商酌擬將守兵仍留守塘汛堆卡將戰兵提出分爲兩班如係提鎮標下卽分紮提鎮營中軍衙門如係副將遊擊都司營頭卽駐紮該副將遊擊都司衙門配齊鎗礮器械逐日操練務使技藝嫻熟無論日夜遇有盜賊立卽出隊拿辦以免疏虞所有戰兵守兵均隨時查點不容短少庶兵不虛設餉不虛糜仰副朝廷整飭戎行之至意報聞○乙丑諭本年輪應查閱直隸山西陝西四川甘肅五省營伍之期直隸卽派張樹聲山西卽派張之洞陝西卽派馮興駿四川卽派丁寶楨甘肅卽派譚鍾麟逐一查閱認真簡校如有訓練不精軍實不齊者卽將廢弛之將弁據實參處毋得視為具文○丙寅諭御史何桂芳奏各省酷吏濫用非刑並容反刪改犯供薦引徒黨請飭嚴禁各摺片地方命盜各案全在承審官虛衷研鞫不事刑求方足以成信獄刑部核議罪名以各省解部招冊爲憑若如該御史所奏酷吏非刑逼供種種殘忍其有情節可駁者必經幕友刪改送部何以重民命而得確情著各直省督撫嚴查屬員中有濫用非刑者立卽參辦毋稍寬縱遇有提省要案督同臬司親訊明確並嚴禁幕友刪改犯供務得情真罪當以

副朝廷明慎用刑之至意上司幕友薦引徒黨廣通聲氣實屬有干例禁並著嚴行禁止以挽積習○丁卯諭崇綺等奏蒙古王旗延不解送犯證請旨議處一摺達爾罕王旗台吉丹比呈控台吉敦都圭等毆斃人命一案迭經催提人證該王旗輒敢抗不解送藉詞支吾實屬藐玩已極著理藩院查取職名照例議處並著該王旗即將此案應訊犯證按名解交盛京刑部審訊定擬另片奏部提各王旗應訊犯證抗違不送者甚多開單請旨飭催等語所有張洪太等呈控各案著理藩院勒限嚴催各該盟長扎薩克王旗等務將應訊人證按名依限迅解毋任玩延○戊辰諭黎兆棠奏開去光祿寺卿及督辦福建船政差使福建按察使張夢元著開缺發給三品卿銜督辦福建船政事宜○鄧承修奏請於本月十二日回邸鈔前督臣李鴻章疏稱前山西藩司方大湜因感冒風寒總赴天津就醫未能克期入都即由津請假回籍修墓並聲明該司歷任廉勤明練官聲均好臣所素知等語不勝駭異臣維方大湜係奉旨來京聽候簡用人員並非直省之官若果有病不能前進則過保定時即應呈請醫治臣張樹聲代奏若能總赴至津則非病可知且天津距湖南原籍四千餘里距京纔數百里道里相去懸殊該藩司即情殷摯謁能問關跋涉於數千里之遙顧不能強數日之程途以稍伸依戀乎避國門而趨樞門重私情而忘公義臣誠不解其何心況方大湜起家州縣固知府不數年而擢任藩司可謂恩遇優隆卽被人糾劾

朝廷飭令來京亦始終愛惜人才之意李鴻章身爲大臣若能濟其被誣亦當俟 朝廷處置然後代爲剖白今乃敘其軍營多年之勞從前聲譽之美亟亟爲惟恐 朝廷之不用市一己之私恩冀後來之選擢大臣以人事君之義固如是耶方今 廟堂之上雷厲風行官嚴吏肅已有澄清之機惟外省督撫監司玩法任情驕蹇如故其被劾來京稍不如願卽中途託病卒有至者卽此一事威令不行已可概見然尙未有 君門咫尺繞道不前辜 恩無忌如方大湜者若不嚴予懲處使鑽窺揣測之徒轉相慕效但得疆吏一語則 詔旨皆屬空文臣恐自此以後爲臣者不復知有 君父植黨者不復知有 朝廷天下事尙可問耶臣愚以爲方大湜違 旨任情已失事君之節縱如該督所陳居官微勞亦不足錄況其詭詐如此卽有虛聲必是巧宦應請 旨將藩司方大湜交部嚴予議處並請嗣後奉 旨來京聽候簡用人員實係患病不前 飭令該督撫勘明始准據情代奏如有飾詞託病別經糾出將該督撫一併交部照違 旨例分別議處庶 國體尊而臣分益明矣 上諭給事中鄧承修奏參山西布政使方大湜請旨懲處等語前經降旨令其來京另候簡用行至天津輒以患病請假回籍殊屬非是方大湜著交部議處嗣後來京另行簡用人員如再有藉端逗遛不卽赴闕或有經過地方督撫代爲陳情者定將該員及代奏之督撫一併嚴懲不貸○己巳兩○諭潘耒奏請裁免米穀蠲一摺米穀爲民生日用之需

江西自兵燹以來元氣未復上年被水成災閭閻生計維艱該撫請將江西米穀釐金一項裁免所奏甚
是卽著該撫徧行曉諭飭令卡員認真稽察毋任吏胥仍前抽收朦混滋弊至各項貨釐並著加意整頓
力杜侵漁中飽情事以昭核實○庚午以景晉陳寶琛爲內閣學士○辛未諭兵部奏遵議處分請將鑲
紅旗漢軍副都統前總管內務府大臣俊啟革職一摺俊啟著改爲降三級調用○以裴蔭森爲福建按
察使○諭內閣侍讀學士文碩奏請重編音以崇政體一摺不無可採向來禮部人員或經奏調差委或
因勞績保獎自應弊敘原案以憑考核嗣後京外各衙門遇有此項人員務將從前稽察案由於摺內詳
細聲明不得僅以緣事降革等語含混入奏以杜取巧○壬申會國荃奏粵東自上年入秋後雨澤愆期
各屬晚禾收成歉薄此邦貢山瀨海本屬產米無多本年春夏之交青黃不濟深虞米價騰貴民間粒食
維艱適據南海番禺二縣轉據省城愛育堂紳董稟請援案招商赴江蘇等省買米回粵平糶經過沿途
關卡暫免應征稅釐當經飭司會核妥議詳辦茲據署廣東布政使龔易圖會同署按察使周恩譽署鹽
運使潘駿猷署督糧道張聯桂及鹽務總局司道詳稱查光緒三年六年春夏間粵東因水災米貴均經
出示招商前赴上海鎮江等處採運米石回粵平糶由司給發護照每照一張限買米二千石奏明免征
沿途釐稅在案現在亢旱之餘民食不足擬卽仿照前辦成案由藩司印刷護照五百張飭令廣州府出

示招商如有商人情願自備資本前赴江蘇安徽廣西各省買米回粵經賣者准由殷實行店具保報明
廣州府詳司給照每照一張限買米二千石毋許藉照影射並夾帶別項貨物俟運米到粵即將護照繳
銷所有前項粵商米船經過各省關卡擬請自光緒九年四月起至六月止三箇月內暫免征收稅釐俾
商販流通閩粵等山詳請援案具奏前來臣等覆核無異合無仰懇 天恩俯念民食攸關准將粵
商領照所買米石經過沿途關卡應完稅項釐金於三箇月限內暫行寬免出自 逾格鴻慈特 旨如
所請行○癸酉杜瑞聯奏據藩司唐炯詳稱滇省產銅各廠山勢豐厚初開礮礦尚不為難每至進山深
處將見連堂大礮輒有積水潑蓄又有生成銅壁形質較大鉅鑿難施若不參用西法雖屬美礦而同廢
銅擬動撥軍銀四萬兩委雲南試用通判張長耀留閩委用通判周德溥前赴上海香港兩處又查道銜
候選知府卓維芳身家殷實辦事可靠兼能明曉機器堪以委令選雇精通機器工匠前往會同張長耀
等向外洋購置抽水鋸銅兩種機器由該守留心查看分別購置所有銀錢事務均歸該守經管如所買
不能合用惟該守責成一經購就即交張長耀等運回滇省發給該廠俾利開採在目前雖不無多費然
廠利既開將來所獲不啻倍蓰實於經費有裨所有此次動撥銀兩應歸採辦銅斤本腳案內核實造銷
等情詳請附奏前來臣等覆查該司所擬係為整飭銅務起見合無仰懇 天恩俯准動款辦理歸於銅

斤木脚案內核實造報得 旨覽○工部奏臣部職在句稽其著爲定例者必實能見諸施行方不致空煩案牘卽如外省工程報銷一事始則視造報爲畏途繼並視奏催爲故事屢延愈久亦愈久愈難調查乾隆十九年正月奉 諭外省動用錢糧及工程報銷應駁應准俱有定例乃該督撫往往於部駁後轉輒行查不及規期辦結或據屬員詳稟疊次聲覆請銷而該部仍復往返駁詰以至歷案累積迨歷年久遠官吏迭更徒致拖累此向來相沿陋習殊非敬事勤政之道現據劉統勳策楞查江南興修水利以來有歷十餘年至二十餘年未結之案自雍正四五年間盛案尙有懸擱者此等案件如果有浮混自當據實查明催追完欸何致任意延歷久不結如果無情弊亦當請豁免累嗣後報銷之案符例者該部不得漫行駁詰例應駁查者至三次後該部具摺聲奏或按例核減飭交該督撫查明經手官員照數追賠完案或據情酌予銷務令規期速結仍著於每年歲底將未完各案彙摺奏聞其現有從前未結各案予限一年令戶工二部通行查明分別辦理完結欽此又於道光七年六月奉 上諭昨據工部奏彙查各省工程未完各案請分別年限查辦各省工程報銷准駁俱有定限乃各該督撫於奉文後不卽規期辦結實屬因循疲玩著卽將該部駁查新舊各案逐一查明未經逾限者按限催辦完結其已經逾限者查取承辦遲延及督催不力各職名參奏議處仍嚴催辦結嗣後各該督撫務當隨時逐案查核依限催

辦冊任再有延宕致干咎戾等因欽此 臣等恭繹幾次 諭旨一則杜部中之往返駁查一則懲外省之因循疲玩法至善也嗣是以後咸豐十一年 臣部將道光十五年以前未結各案限六箇月辦結如再逾限一面註冊一面將用過錢糧分別著賠同治八年 臣部復改定以二十年爲限二十年外卽行分別註銷然奉行日久竟成具文歷年以來未嘗指參一人著賠一欸推緣其故總緣二十年後官非一任事隔多時若一律著追則離任者輒留異地已故者且累及子孫於政體實多窒礙現在 臣部籌修則例 臣等熟商妥議與其空懸令甲留書吏搜剔之門何如更定章程布 朝廷寬大之典擬請自同治十三年臘月以前作爲舊案一概免其著追自光緒元年正月以後未結各案概以接奉部文之日起予限二年報部核銷如再逾限卽由 臣部專摺劾參請 旨飭交吏部照例議處其九年正月以後按限造報如有逾限卽照前議一體辦理以清歷牘而免積疲如蒙 俞允應請 特頒諭旨通行各直省督撫一體欽遵辦理 臣部一面查明光緒元年以後未經辦結之案開繕清單恭呈 御覽懇請 特有嚴催一面將擬定新章纂入 臣部則例永遠遵行又奏 臣部例載士民捐資自行經理之工由督撫奏請分別獎敘一面飭造工段清冊送部存案至工料冊籍有不能盡合部例之處應覓其文法毋庸往返駁查等語又咸豐六年欽奉 上諭各直省修辦一切工程係民間捐修並不邀請議敘者均免其造報其士民出資捐修

奏請獎敘均著一體造冊報部核銷予以保固限期以符定制等因欽此臣等伏查民間修辦工程既經督撫奏請給予獎敘卽與動用正款無異自應欽遵咸豐八年諭旨令其一體造冊報銷立限保固用昭核實至工料做法臣部定例纖屑曲折鉤稽必審誠恐民間自行辦理之工未必能盡諳成法若拘泥例文動輒駁詰易滋弄吏延擱需索之弊擬請嗣後各省民捐民辦工程奏請獎敘者除冊報錢糧數目與例大相懸殊應行議駁分別辦理外其錢糧之數不甚相懸而工料做法有未能盡合例文之處仍循舊例免其往返駁查以杜弊竇而示體恤得旨如所議行○岑毓英杜瑞聯奏臣等於光緒九年正月初二日承准軍機大臣字寄光緒八年十二月初十日奉上諭總理各國事務衙門奏法越交涉一事法人現欲與中國會商請飭預籌善法一摺亟須預籌各省先事妥籌以備臨時會議著將應行籌畫各節查照該衙門前函詳慎妥議如何有利無害堪以行之久遠迅速奏明並知照該衙門以憑駁辦原摺單均著鈔給閱看將此由五百里各諭令知之各等因欽此欽遵寄信前來臣等跪讀之下惶悚莫名伏查法越交涉一案疊准總理衙門函詢臣等均隨時陳覆並將藩司唐炯出關查看情形節次密陳嗣承准總理衙門函示法使寶海所議辦法三條復經督同唐炯擬議五條並繪具南北圻圖說及須從緩通商各情函請總署駁辦在案茲復欽奉諭旨飭令先事妥籌臣等敢不殫竭愚忱倍加詳慎查覈海

所議中國官軍退紮一條法兵是否退紮並未議及可見其居心叵測現在滇省防軍僅駐紮滇越交界未經深入毋庸再行撤退其第二條彼國願設法自海口以達滇境有裨商務等語滇省地瘠民貧洋貨難銷亦無土貨堪行外洋於商務毫無益處且商人惟利是圖能否運貨至保勝須出彼情願不能刑驅勢迫所請將土貨運往保勝窒礙難行而彼族藉口通商實係垂涎麻利等現已將麻務整頓遴委官紳分投開辦使彼無可爭之利亦足伐其覬覦之謀該使所謂驅逐盜賊撤去保勝關卡自係暗指劉永福而言等前不欲顯用此人正慮彼藉詞尋衅將來會議請明告以劉永福係屬越官非同土匪未嘗得罪中國不能無故驅逐若於此路通商僅劉永福阻遏中國亦不能代為管理預先說明庶免受彼要挾其第三條欲於紅江中間分界保護意在蠶食巔而易見夫越南久列藩封尺地一民無不仰邀 覆轡又何用更分疆界今越國既不能自強亦惟有姑就此說以息爭端謹按越南與國富春國都以北除廣治省旗平道為左圻外其餘河靜又安甯小清化南定興安河內海陽北甯廣安諒山太原高平山西興化宣光各省均為北圻富春以南除廣南省廣義道為右圻外其餘平定等省均為南圻必須將北圻各省全歸中國保護與富春國都聯為一氣緊急可以援應方能保此危邦而河內省現係法人占據未必肯輕易退出如萬不得已亦只可分此一處馬頭為彼貿易之所此外不容侵佔所有北圻各省守以

滇粵防軍及越國官兵足資分布滇省兵力有餘惟餉需不足仰蒙 天恩敕部籌撥接濟自不致掣肘其應如何布置容俟 臣等商酌兩廣督臣曾國荃廣東撫臣裕寬廣西撫臣倪文蔚妥籌辦理總之疆界可分而北圻斷不可割通商可許而顧利斷不容分土匪可驅而劉永福斷不宜逐其他不關緊要者無妨姑准一二以示轉圜夫制勝之方貴知己知彼今法兵在越不滿千人故得河內而困守越南定而無功既恨劉永福之阻其前又慮我軍之蹶其後德與法世仇也又從中牽制情虛勢絀實海始有此調停之舉似宜堅持定見示以牢不可踰之限制使彼就我範圍不致貽害將來方可行之久遠臣等與藩司唐炯悉心商酌意見相同應請 旨敕下總理衙門暨兩粵督撫 臣等前次所議五條及此次覆陳各節詳加商酌以便臨時會議藩服幸甚邊隅幸甚 上諭軍機大臣等岑毓英杜瑞聯奏遵議覆陳一摺洵為扼要之論深合機宜近聞法國欲更前議並欲將該使質海撤回彼族反覆無常惟當持以鎮靜嚴中籌備著岑毓英杜瑞聯倪文蔚督飭關外各營擇要扼守妥籌防範固不宜深入越境亦不可稍有退款以期固邊疆而維大局○甲戌諭御史奏午門開啟任意遲早正黃旗值班為尤甚等語禁門啟閉向有一定時刻豈容故意遲延著前鋒統領護軍統領申明定例以時啟閉並著隨時稽查值班弁兵如有怠惰偷安及飲酒賭錢情事即行從嚴懲辦○吉林將軍銘安以剋免○諭御史倭又奏特參司員取

巧黃緣把持公事請飭查明嚴懲一摺據辦內務府銀庫郎中齊克森布係由現任緞庫郎中黃緣調補並聞該員有把持公事擅派職官情事著總管內務府大臣確切查明據實具奏○魯珙光奏閩閩物價增減隨時應公平給值交易臣稔知東南數省文武大小衙署間有逐日入市購物僅給半價或價不及半謂之官價比聞各省均有此風而直隸山陝河南各府州縣有官價者尤多積弊相沿由來已久民間準物估值彼此均平而官價酌給已多扣減中間假手胥吏及差役等輩侵蝕剋扣小民得價不過十之二三甚有應辦公務如省會舉行鄉試等事胥役人等動以辦差為名責令各行鋪戶供應諸物下至零星販賣亦無一得免者擾害民生莫此為甚竊思民為邦本必使胥浪怨咨況近來民生日感各省富商大賈獲利亦微其餘稍有資本及借貸轉移者藉刀錐之末利謀舉室之生資冀有贏餘艱難萬狀加以官吏侵漁實有民不堪命之勢相應請旨飭下各省督撫臣通諭各屬將所有官價舊規一體裁汰其逐日尋常用物固須照案給值即辦公需用之物亦應一律按物付價不得以辦差為詞則小民樂安本業獲惠非淺鮮矣上諭御史魯珙光奏官價病民請飭裁免一摺據辦各省文武衙門逐日購物類給官價假手胥役又復侵蝕剋扣其舉行鄉試等事輒藉辦差為名責令各鋪戶供應等語各衙門購買物件應照市價給值何得別立官價名目至辦公需用均應按物付價豈容藉端擾累著各直省督撫通

飭所屬革除陋習嗣後如有仍蹈前轍者隨時懲辦以恤商民○岑毓英奏據藩司唐炯詳稱滇省承平之時額運京銅及各省採辦本省鼓鑄不下數百萬兩之盛如此軍興後遂爾廢弛同治十三年奏請試辦無異創始歷年以來加本脚免抽課銅鑄復經費體恤調劑不爲不至而每年湊運五十萬猶復拮据非必嗣老山空其故略有數端一則砂丁招集不易從前大廠動輒十數萬人小廠亦不下數萬非獨本省窮民凡川湖兩粵力作功苦之人皆來此以求生活滇諺所謂丁由利集銅由丁出也自經兵燹加以疾疫戶口凋歿僅存十分之一而商賈不能流通田土又多荒蕪凡百生計艱難外省客民遂爾裹足砂丁既少雖有美礦無憑攻採一則爐戶虧折太甚向例銅砂煎出每百斤徵課十斤耗銅四斤二兩餘銅歸官收買乃法久弊生於是銅本則扣減平色留難守候收銅則私製大秤重兌浮收加以看銅改煎種種需索每銅百斤爐戶獲價有僅得銀四五兩者不數開銷勢必填壙挪新日久積成巨欠而本省市價每百斤值銀十餘兩鄰省二十餘兩小民趨利罔知犯法良善歇業狡黠走私而廠務日形棘手矣一則民間資本不厚向來辦廠見功遲速不能預期如置備器具修橋開路以及油米柴炭需費甚鉅從前賴外省富商挾資來滇開採百物流通民間生計藉以裕饒至於本省戶鮮殷實不過零星湊集朋充夥辦軍興後常年衣食率多不給更無餘資以謀廠利各廠爐戶既無資本以開新山又不忍舍舊時贖銅

但湖莊洗煉精領官項圖混目前而承辦之員大都見小欲速不謀久遠長此不變莫復領運恐竟無期
一則地方官辦理弊多從前定章本有駐廠委員原以地方官事務繁多不能親駐廠中勢必假手親幕
丁胥官商情隔徒滋弊竇自前署藩司倉景倫請改歸地方官辦理東川永北等處爐戶虧折拖欠日深
不獨民間視為畏途不肯與官交涉即其餘有廠各屬地方官亦皆畏累卻顧率以桐老山空一票搪塞
此時若不改併更張勢必江河日下以後益無從整頓該司抵任以來凡遇官紳商賈稍知廠務即向其
諮訪利弊各令條陳並派員弁徧歷東昭永北各廠就詢熟悉廠務老民既得悉受病之源因考求補救
之法咸謂銅非丁不出丁非利不集現在蜀患人多湘患人少宜先開辦附近川邊之東昭永北武定各
廠以次及於曲靖楚雄順寧開化臨安庶便招集惟人情轉徙無常必使其謀生有資然後視為樂土相
率而至是宜復通運道俾商賈流通口岸日開謀生路廣遠近窮民移家就合生聚滋多不但目前廠務
有益而各屬田土亦可冀次第開墾此實事理相同有必然者至於裁革使費以絕弊端預借底本以示
體恤寬予年限以資調劑開新廠以圖久遠官商並辦以期合作得以順協人情鼓舞興作一年之間必
有起色三年之後決著成效該司非確有把握萬不敢遽議更張等情詳請具奏前來臣覆查滇省銅務
開辦已將十稔迭經督同各任藩司竭辦幾於寢食俱廢法經屢變而效尚難期推原其故求循法之人

易求核實籌畫於行法之人難茲該司視力既繁體察亦均真切所議各條經臣等逐加商度意見皆
同立論已具端倪辦理當收實效自未便稍拘更張之見致誤整頓之方謹將詳到章程五條另繕清單
恭呈 御覽並請 旨飭部核議立案以便遵行其餘一切事宜容飭司隨時體察情形再行酌議辦理
下部議奏○乙亥諭本日召見恭親王病體已愈深慰慮懷惟精神尚未復元著再賞假一箇月安心調
理○諭文秀著留京仍補授右翼總兵馬蘭鎮總兵兼總管內務府大臣著英廉署理未到任以前著傅
豐署理○丙子諭著都察院左副都御史張佩綸奏堂姪張人駿現補御史應否迴避請旨遵行一摺張
人駿著毋庸迴避○頒給湖南 南嶽廟匾額○戊寅彭玉麟奏臣於去年十一月初十日奉 旨往湖
北省查覆操防兵丁滋事一案事竣回浙至十二月二十五日始抵西湖退省菴卽於是日承准軍機大
臣字寄十一月十一日奉 上諭前因有人奏湖北營兵滋事一案迭經諭令彭玉麟確查具奏等因欽
此查前次 諭旨業於十一月二十六日覆奏在案此次 諭旨因臣越鄂往返數千里行蹤無定驟遞
轉折是以奉到稽遲 臣病軀感寒怔忡咯血筋骨疼痛諸症益加劇發眠食減少交春更甚受 恩深重
未敢偷安復於本年正月初四日出江沿途訪查謹遵 旨續爲我 皇太后 皇上陳之查徐宗瀛係
由舉人於同治元年大挑知縣分發江蘇前任大學士兩江督臣曾國藩先官京師留心人才卽已賞職

及督兩江駐節安慶軍務糧運最關緊要因宗瀛棲實廉幹委司穀米局三年籌解數百萬石軍糧轉運
前敵絲毫無誤金陵克復委總辦金陵城內保甲局署理江甯知府後經前任大學士署兩江督臣李鴻
章奏補江甯府知府辦理善後事宜是時大亂初平兩督臣興廢舉墮利民除弊諸政如同再造宗瀛
皆矢勤矢慎盡力匡襄一府之事亦絕無貽誤至今口碑載道兩督臣屢次列保人才由是上達 天聰
洊擢今職其任上海道湖南藩司廣西河南巡撫亦曾無貽誤之處此其出身升用之所由來言者乃謂
由報捐同知升用是其履歷尙未深考謂宗瀛專以封殖爲務揚州上海安徽本籍貿易產業甚多
查宗瀛生平最講操守歷官數省同官屬吏共信共知何有專務封殖之事揚州上海貿易產業者原
自有人宗瀛廉恥自持謹小慎微實不爲此惟其歷任缺分尙優居身過於節儉在本籍六安州鄉間
買有莊房兩所田數百畝分與兩胞姪爲世業本身子孫兩房鄉間有老房一所城內新街住屋一所買
田計不足千畝留爲退老及子孫教育之資此皆人情之常且從節儉而致似亦不足爲異六安州亂後
書院並考棚防兩公會片瓦無存宗瀛倡首捐建成功因此遂訛爲置產甚多歟至謂其江甯藩庫
存銀十六萬兩交藩司梁燾煌經營臣查藩庫非代人存私財之地藩司非代人經營私財之官宗瀛
久離江甯梁燾煌非其齒屬未謀一而末通一音何至輕相許與此不辨而明者也惟查宗瀛在上海

道時前巡司洪汝奎管理金陵軍需局兼書局涂宗瀛與之同鄉同年寄存銀一萬兩託其代刻朱子大全集二程全書近思錄朱子年譜理學宗傳辨正倭文端遺書並醫書多種又因前刑部右侍郎吳廷棟是其同州先達涂宗瀛少年嘗從同學吳廷棟清德冠時年逾七十告歸之後上無一瓦之覆下無一隴之殖流寓山東曾國藩李鴻章迎居金陵安貧樂道涂宗瀛託洪汝奎爲刻其書並經理身後及入祀鄉賢祠一切用度所餘不足二千涂宗瀛調河南巡撫時將廣西湖南積存廉俸一萬兩奏明買米捐賑因提前存洪汝奎餘款帶至河南應用者又或因此而傳訛至謂其在湘撫任內保甲緝捕並不認真查涂宗瀛辦事向來結實撫湘未久升任而去自未能從容辦理又謂調兵自衛查各省督撫年節皆於頭門左右支帳駐兵以肅體制係屬實情撫署圍牆素矮涂宗瀛不肯因陋就簡加高數尺外間稍有議論然實是理所應爲至謂正月初四日撫標聚眾一節查中軍參將施鴻恩素日約束兵丁甚嚴冬季派兵協同更夫看守各街巷木柵該兵丁以爲非其本分多與怨言新正飲酒戲賭營兵以爲歲時伏臘不在例禁之列施鴻恩必欲嚴責以整營規該兵等遂逞醉滋鬧事誠有之然爲數無多尙無聚眾拆署之事涂宗瀛聞之立即委候補道劉鎮長沙協副將春祥查辦該兵丁酒醒知罪共舉四人杖責收監正擬嚴辦經在籍紳士憐該兵等悉有老親懇求保出約束復行重責枷號革糧釋回該管官撫標千把總游

定澤等俱已摘頂撤任此係照例外結並非未辦一人敷衍完案請任湖廣總督收受川鹽陋規新提關稅仍蹈舊習一節查涂宗瀛素慎操守亦時以操守繩人其任內分所應得未必能一介不取其同流合汙之陋規當不至仍蹈故常所參收受川鹽陋規及新提關稅須查與受過付無有實據謂鄂省兵丁滋事時首將眷屬私送過江以致民心驚駭一節臣前次往鄂查復時據通省官民謂督臣治兵過嚴辦理前事稍近操切者有之未嘗聞有人言其眷屬首先私送過江者耳目衆著公論昭然臣督辦長江水師多年涂宗瀛始以大挑知縣到省其後洊至大用臣與之但有公事相接並無私交深知其居官爲人辦事勤慎治躬清儉居心正大與人誠樸廉於取財亦未能惠以濟衆嚴以守己亦未免苛以繩人愛民敬賢而惡惡不無稍過隨才任使而知人未能盡明於吏治是其所長於兵事是其所短往者督撫中如曾國藩胡林翼體用俱備文武兼資而又能尊賢養才知人善任誠量閭閻不計身家加之軍務雖繁而學問進德日勤不懈數求哲人博訪周諮以爲輔翼虛衷納諫絕不自矜所以能爲我國家撥亂反治戡成中興大業洵足爲督撫將帥立法也涂宗瀛局量規模不能及此然在今日督撫中實爲廉正老成精勤任事之員是其才具品行固久在 洞鑒之中不敢稍爲徇隱報聞○乙卯陝西布政司王思沂以病免○以龔伯英爲陝西布政使張熙爲陝西按察使○原任吏部尚書萬青霖卒賜卹如例○諭內閣侍

讀學士文碩奏已革給事中張觀準素不相識輒投名刺請見稱有要事面談意存嘗試請旨飭查究辦等語張觀準業經革職著卽飭令回籍不准在京居住○庚辰諭前據刑部奏河南盜犯胡體浚臨刑呼冤一案疑竇甚多當經降旨提交刑部審訊茲據該部奏稱審明確情按律定擬並知府王兆蘭遞呈混訴應否欽派大臣飭提該員會同覆訊各摺片據稱詳加研鞫王樹汶一犯係被胡廣得誘脅同行逼令服役胡廣得行劫張竹堂家令伊在曠野地方看守衣服並未告知搶劫情由盜犯胡體浚另有其人經差役劉學太等縱放教令王樹汶頂替其程孤堆王半天二犯均係案內正犯王樹汶與胡體浚委係二人該省官員原辦錯謬覆訊迴護現已審訊明確將全案供招鈔錄呈覽等語此案既據奏稱眾供確鑿毫無疑義所請欽派大臣會同覆訊之處著毋庸議程孤堆王半天聽從胡廣得行劫把風接賊同出相濟著照所擬斬立決卽行正法王樹汶跟隨胡廣得服役胡廣得行劫時代伊看守衣服既非同謀上盜亦未分受贓物著照所擬杖一百徒三年不准減免鎮平縣馬嵩初審此案並不虛衷研鞫輒用非刑逼供率行定案迨王樹汶呼冤以後又復捏詞具稟希圖朦混實屬糊塗謬妄開封府知府王兆蘭候補知府馬永修覆訊此案與王樹汶呼冤之故始終並未根究捏飾各節一味糊塗實屬鍛鍊周內王兆蘭馬永修馬嵩均著革職發往軍臺効力贖罪馬嵩據供親老丁單不准查辦留養候補同知臧政倬與署鎮

平縣鄭子儁向役吏教供候補知縣丁彥廷教地保捏供並勸事主冒認均屬巧於逢迎著一併交部議處河南巡撫李鶴年河東河道總督梅啟照以特旨交審要案於王樹汶冤抑不能平反徒以迴護屬員處分朦混奏結迨提京訊問李鶴年復以毫無根據之詞曉曉置辨始終固執實屬有負委任李鶴年梅啟照均著卽行革職前署按察使麟椿於招解重囚並未詳加究詰囚犯未翻供卽照擬勘轉前任巡撫涂宗瀛具題均屬疎忽與隨題照覆之刑部堂司各官著一併交部分別議處察議餘著照所議辦理另片奏鎮平縣等處盜風甚熾請飭設法緝查等語河南鎮平縣一帶爲搶匪出沒之區搶劫成風皆由差役與賊勾結分贓以致盜劫之案層見迭出卽如此案逸盜尙多亟應嚴拿懲辦著河南巡撫遴委賢員認真緝捕務期悉數弋獲毋任漏網如有差役通賊情事一併查拿從嚴懲治以靖地方○以桂祥爲庫倫章印辦事大臣○以慶裕爲河東河道總督楊昌濬爲漕運總督鹿傳霖爲河南巡撫○是月德意志國使臣巴蘭德回國參贊譚敦邦署理○義大利國使臣盧嘎回國由德意志國使臣兼理使事○日斯巴尼亞國使臣羅德里回國參贊吳禮巴署理

光緒五十三

臣朱壽朋敬編

臣沈彭年恭校

三月辛巳朔諭昨有旨將慶裕調補河東河道總督鹿傳霖補授河南巡撫梅啟照李鶴年均著俟新任到後再行交卸○以魏光燾爲甘肅布政使張凱嵩爲四川布政使譚繼洵爲甘肅按察使如山爲四川按察使○癸未左宗棠奏臣於光緒九年正月十六日恭摺銷假並擬中旬出省親赴各處驗收工程各緣由奏奉 諭旨知道了欽遵在案 臣將署中日常事件飭交梁肇煌代拆代行牌傳沿江各道府州縣及各防營各於轄境營汛守候隨同履勘以備諮考正月二十四日乘坐祥雲輪船歷上元丹徒丹陽江陰靖江寶山海門儀徵江都甘泉泰州如皋通州東臺鹽城高郵寶應各屬十八日閱視朱家山工程回省料檢署中積贖稍資休憩二十七日復出省勘收赤山湖工程二十九日由三汊河順流至通濟門回省竊維江南要政以水利爲急前明各臣有若夏原古周忱海瑞我 朝治吳有聲績著推陳鵬年陶澍林則徐皆名顯當時功垂後世誠以民爲邦本食爲民天水利興而後旱潦有備民得所養而後禮義靡恥由此興尊親樂利之心由此篤民心定民力紓官司有所恃以爲固 臣自履任以來苦於經費無措不

得不於鹽務籌之惟課釐正項不敢擅請致煩周折定擬票費按行定價隨時批發藩運兩司專款存儲聽候指撥比積有鉅款始飭沿江各州縣所轄之水利分別官修民修大舉興辦其屢遭兵燹民力實有不逮者飭各統領營官代其工作或爲之倡導同時並舉時越一載而後成效始有可觀怨而不興而頌聲起矣臣此次親臨勘驗沿江而下歷裏河下河以抵壩海各鹽場復勘驗范堤馬棚灣車邏壩清水潭諸要工帆隨江轉到處焚香列案老稚男婦跪伏兩岸人語喧雜皆含樂慶之聲豆麥彌望青葱其積擬種稻者叱犢翻犁正忙東作新種桑秧榆樹應落成行柳葉則舒青垂纒漏洩春光俱漸作依依態矣舟行鏡裏對此每飯加餐心曠神怡不復知于役之苦也統計各處工程均結實飽滿較上年加高培厚宜洩有資惟朱家山河工關係滁州來安全椒江浦六合各州縣農田水利石工土工既鉅且要致力殊多掘淤泥八九丈露出一碑爲嘉慶七年前江甯布政使康基田所立碧泉碑康後官河督亦著聲績者也碑中所言治河要略與今無異而碑沉水底已七十七年是此次之鑿險絕幽不遺餘力亦概可想見碑下石骨礫礪句連兩岸石質稍嫩者尙可用工鑿鑿堅者非火藥轟之不可適前福建布政使王德榜假歸道過金陵使邀其前往相度並令指麾蒞部之現隸親軍者助力一任其難度既成此一贊之功卽樹數十百年之績亦楚淮將士所樂聞者水利俸成則沿江下游一帶旱潦無虞歲獲常稔不但民食充裕

且可汎舟出耀而民富兵強日臻其盛矣報聞○丁亥祭 先農壇道載勛恭代行禮○戊子諭軍機大臣等總理各國事務衙門奏越南事宜現有變局亟應密籌防務一摺廣東原駐廉瓊水師營曾國榮裕寬飭令吳全美移近越洋認真巡哨不可稍涉疏懈此次籌備各節非從前事機尙緩可比該督撫等務當悉心經畫實力整頓總之衅端不可自我而開要必壯我聲威用資鎮懾○已丑諭劉秉璋奏請調員差委等語江西南昌府同知崔國榜著潘爵飭令該員迅赴浙江交劉秉璋差委○諭劉秉璋奏請飭調將領一摺記名提督楊岐珍著張樹聲飭令該員迅赴浙江交劉秉璋差委○諭宗人府刑部奏審明直隸安州私罪官定一案分別定擬一摺此案王福祥於禁錮浞地輒起意捏造租冊商同張金謀勾串護軍校薩彬將浞地朦混投獻溥泰公府希圖倚勢壟壟充當莊頭實屬膽大妄爲王福祥著照所擬發邊遠充軍到配折責安置張金謀聽從投獻往向薩彬說合著杖一百徒三年禮部郎中孟傳金明知浞地禁錮仍向薩彬告稱可辦並代溥泰擬札文告示諭帖復捏名頂冒希冀分種地畝殊屬不安本分著革職發往軍臺効力贖罪薩彬身充公府包衣於王福祥等投獻浞地並不確切訪明遽行勘丈張貼告示亦屬咎有應得薩彬卽田瑞著革去護衛衛護軍校杖九十徒二年半該犯與王福祥俱供母老子單均著不准留養奉恩鎮國公溥泰於王福祥等具呈投獻浞地並不查明是否禁錮輒輕聽孟傳金之言

託擬札文告示諭帖等件並親筆標註派人前往勘丈卽係已受投獻溥泰著革去公儲仍照例折圈禁
一年以示懲儆○諭前因御史俊又奏參內務府銀庫郎中齊克森布取巧賁緣把持公事等款當諭令
總管內務府大臣查明具奏茲據奏稱內務府銀庫差使緊要齊克森布由緞庫郎中調補銀庫係按照
例案辦理庫掌文林經前任該管大臣派管庫作差使嗣升員外郎仍留造辦處當差旋經廣儲庫作
差使全行開去均非齊克森布所能干預至原奏賁緣營謀一語究竟賁緣何人及何人受其賁緣請飭
指實以憑查辦等語卽著俊又將所參齊克森布賁緣營謀一節指實具奏○諭前據內閣侍讀學士文
碩奏請嚴正奏議體裁當降旨令都察院堂官議奏茲據該堂官奏稱所陳各條立言踳駁不便施行等
語臣工奏議自有體裁其間偶有錯誤朝廷意存寬大原不加之責備惟陳奏摺件理應恪慎將事不得
稍形輕率嗣後建言諸臣務當留心體要敬謹敷陳以昭慎重文碩所奏著毋庸議○諭刑部奏戶部主
事王樂等呈告侍衛金鳳岐毀牆毆工一案傳訊金鳳岐輒在司堂踞坐並不候喚訊自行走回顯係恃
符抗違請旨解任等語三等侍衛金鳳岐著先行解任歸案審訊○諭軍機大臣等總理各國事務衙門
奏越南事宜現有變局亟應密籌防務一摺現聞法兵已攻破越之南定並擬將寶海撤回事已中變情
殊叵測在我保護屬邦固守邊界均屬緊要亟應妥籌預備著岑毓英倪文蔚杜瑞聯督飭關外防軍挑

選勤旅扼要進紮該兩省現在駐越兵勇若干著查明確數具奏應否添派隊伍以厚兵力卽行體察情形妥爲辦理○諭翰林院侍講陳學棻奏武英殿書版闕失請飭查明補刊等語著該管王大臣查明現開書版先將經籍補刊餘俟陸續刊刻完全用備觀覽○諭前據總管內務府大臣奏遵查郎中齊克森布參款請飭俊又指明賈緣何人及何人受其賁緣等語當諭令俊又指實具奏茲據奏稱賈緣蹤跡非外人所能得其底蘊齊克森布優缺要差莫不兼攝使非衆論譁然何敢無故糾彈等語銀庫郎中齊克森布被參各款業據該管大臣確切查明並無不合均著毋庸置議該大臣仍當隨時察看齊克森布能否稱職毋得稍涉瞻徇至御史雖係風聞言事必當詳加考察確有依據方可入告若以毫無實據之詞率行參劾冀博敢言之名亦難逃朝廷洞鑒也○以成孚護理河南巡撫○壬辰諭吏部奏遵議處分一摺湖廣總督前任河南巡撫涂宗瀛應得降二級調用處分著加恩改爲革職留任刑部堂司各官應得罰俸處分均著准其抵銷○以祥麟爲內閣學士○左宗棠奏院省引票先經臣奏明增復四萬二千八百五十八引每引收票費銀十六兩接准部咨如果加引不嫌過驟票價無慮偏枯自可照議辦理旋又續准部咨議覆御史李映片奏令新商伊厚堃等按照四千兩定章補足票費各等因當經分飭運司孫翼謀前署運司現署淮揚道徐文達妥議去後茲據該司道等會詳院戶部例向係由商因時值高下呈

繳並無一定數目若令援照四千兩補足無論新商力難承運即舊商亦有本重利薄之嫌詳加體察擬就已繳之三十五萬七千一百六十兩按數除零給發一百四十八票准其循環轉運每引仿照鄂湘收票費銀二十兩原與部文繳足全費與楚岸一律方准領運行銷等語照合詳請覆奏前來臣查增引一事本以察酌岸銷商情為主前次請復四萬二千餘引一因銷路尙屬暢旺一因新商開風踴躍是以將舊額全數規復自去歲夏間皖省蛟水爲災銷路較滯商情因之觀望與春間加引時情形不同自應將所增引數量予酌減斯新引獲轉輸之益舊引無占礙之虞此次該運司等請給循環一百四十八票計祇給運一萬七千七百六十引照原奏不及一半之數而票費前定每引十六兩今仿照鄂湘收繳每引計增四兩核與部議尙屬相符實諸案商均無異說下戶部知之○癸巳諭倪文蔚奏請調員差委等語前廣西補用知府王政慈著卞寶第飭令仍回廣西原省交倪文蔚差委○乙未諭彭玉麟奏瀝陳下情懇請收回成命一摺彭玉麟實力有年聲望夙著是以簡授兵部尙書用費倚任茲據奏陳病狀靡系良股著該尙書加意調理一俟病體稍愈卽行來京陛見毋庸開缺○左宗棠奏准部咨議覆御史李映泰准北增引宜加詳審議令新商厚德昌等援照淮南定章每票補足銀一百兩方可加十六萬引之數如該商等無力猝籌補足應卽劃除引數暫勿增給等因伏查淮北票鹽原額四十六萬引兵燹以後僅

辦二十九萬餘引迭經戶部咨催復額上年春間據厚德昌等三十二商稟請認復十六萬引每引繳銀
二兩比前繳銀三十二萬兩附片奏明旋准部議核准上年業已辦運一綱續准部議令該商照淮南定
章每票補足銀二百兩復經札行會議茲據兩淮鹽運使孫翼謀前署運司現署淮揚道徐文達詳稱淮
北票價本無一定之章票價之長落皆視商利之厚薄淮北淮南鹽價既相懸遠而淮北先課後鹽尤與
淮南章程迥異票價每引二兩已較舊商指數倍增若再令補繳崇實商力實有未逮而劃除引數未免
成本貽增仍請照前次部議核准之案免其加價扣引等情詳請具奏前來查該司等所詳均係實在情
形且久經核准辦運未使朝令夕更報聞○諭軍機大臣等前因李鴻章奏請回籍葬親當經假兩月
現在北洋事務緊要李鴻章營務事畢著不必拘定假滿即回著任該大臣公忠體國定能仰副朝廷倚
任之意不致稍涉稽遲也將此由五百里諭令知之○諭軍機大臣等前據總理各國事務衙門奏法兵
攻破越之南定當諭令該督撫等將防務密佈在現聞法人在越南境內勢更猖獗沿海邊防尤屬喫
緊前諭徐延旭出關現在諒已前往著倪文蔚飭令會商黃桂蘭趙沃相度機宜速籌防禦海省邊境亦
應酌派大員帶兵駐紮著岑毓英杜瑞聯飭令唐炯迅速出省統率防軍擇要扼守兵力若有不敷即著
酌量添撥總期滇粵兩省互相聯絡力保越南北圻即以固吾邊圉○諭軍機大臣等前據劉錦棠奏中

俄界約以天山之頂爲限此次沙克都林扎布同俄使勘分新疆南段界務將貢百魯克山口至別疊里之達坂路西邊相離二十二丈半獨立中俄兩國界牌鄂博使佔至畢底爾河源所稱別疊里即別底爾嚮北逆流河水即阿克蘇上流之畢底爾河口達坂即烏什出貢百魯克卡以達伊犁之路此路爲南北相通第一津要遠在界綫之外新舊條約班班可考不趁畫分未定按約索還南北隔絕伊犁勢成孤注等語當派長順會同沙克都林扎布於履勘時按約力爭設法挽回該處現在雖立界牌鄂博尚未定局著曾紀澤與俄國外部大臣詳細辨論令其傳知該國分界官與長順等重加履勘更立以符定約將此諭令知之○庚子諭鑲白旗滿洲都統伯彥謨帖等奏前任總兵年屆百齡一摺前任甘肅肅州鎮總兵萬福前在軍營曾著勞績咸豐年間開缺回旗奉 旨賞食全俸現屆百齡精神強固洵爲熙朝人瑞萬福著加恩賞給頭品頂戴所有例應旌表之處仍著禮部核議具奏○以克蒙額著理正黃旗漢軍都統穆隆阿爲正藍旗漢軍都統○諭軍機大臣等總理各國事務衙門奏籌辦法越事宜一摺法人在越南更形猖獗前疊諭曾國荃等實力籌防必須在我者進止足恃確有把握乃可相機因應該督撫等接奉前旨自己妥籌備禦等語英倪文蔚杜瑞聯務即督飭防軍調撥動旅擇要進紮所有籌備各節總以足壯聲威不得稍涉鬆動即著該督撫等將籌辦情形迅速奏聞以慰虛系○辛丑諭前據游百川奏

察看黃河酌擬辦法繪圖呈覽游百川陳士杰奏查明黃河下游情形各一摺當經諭令再行籌畫會同
熟商妥議詳細具奏茲據奏稱擬由築堤藉資保障開徒駭馬頰河以分水勢並擬開濬小清河及遙
堤寧礙難行各摺片著戶部工部連議具奏○戶部奏伊犁將軍金順等奏勘分科境分別安撫蒙哈請
由部庫撥款一摺光緒九年二月二十七日軍機大臣奉 旨戶部連議具奏欽此欽遵交出到部據原
奏內稱前承准軍機大臣字寄八月初三日奉 上諭清安額爾慶額奏勘分科境邊界未敢冒昧從事
等情繪圖呈覽請飭妥議一摺據稱現在分界若將新約內之奎喇山及科屬之哈巴河等處分入俄界
既失地利而蒙民等無地容身恐滋事端等語所奏自係實在情形該處界務崇厚貽誤於前曾紀澤力
爭於後既定新約祇可就原圖應行勘分之處力與指辯酌定新界金順等務當懷遵六月二十一日
諭旨詳慎商辦無庸另行交議至圖中黃綫以西蒙民哈夷約有若干應如何擇地安插籌款撫恤之處
並著清安額爾慶額會商金順升泰悉心妥籌具奏惟分界期迫一時恐難就緒應由金順升泰知照俄
國分界大臣量議推展以期勘定之後彼此得以相安並由總理各國事務衙門照會俄國使臣並知照
曾紀澤轉咨辦理將此由五百里各諭令知之欽此遵 旨寄信前來並恭奉六月二十一日 上諭一
道跪讀之下自應懷遵妥籌迅速舉辦奈黃綫以西為蒙哈所居約計三萬餘衆必先將東蒙哈所居游

牧詳細履勘再行移西就東其能否全行安插尙難預定待明歲春霖夏初卽馳往料理約於五月卽可勘分邊界業經知會俄使會同舉辦再哈薩克決不回塔懇求收撫若不俯如所請必致散漫生事故准其擇地安插並令一律改裝著辦庶於俄屬哈薩克有別該頭目均已樂從惟查蒙民向以牧養爲生前遭回亂所遺牲畜倒斃殆盡其東界蒙民牲畜現存無幾而西界爲尤甚盡奔哈巴河一帶過夏可耕之地現聞勘分地界堅不肯讓前經派員等言開導人心究未能盡服者揆厥由來該蒙民必以今日之撫恤祇能拯救於目前終恐無濟於將來深思久計惟有籌款購買牛羊散給以資牧養前據烏梁海散秩大臣等稟報西界蒙民男婦老幼計約七千餘名內有牲畜者一千數百名又除嬰孩約七百餘口無庸撫恤外其餘無牲畜者五千餘名擬按每名賞給乳牛一隻每名賞給乳羊五隻以備牧養且磚茶乃蒙民必不可少之物每名酌給二塊以資食用再查西界哈夷約計二萬餘人東界蒙民其中貧苦者尙未計其多寡亦當量加撫恤惟思撫恤蒙哈採買牲畜磚茶等勘分境界隨帶文武員弁兵役人等裹帶口糧雇備駝馬脚價以及盤川費號重建立牌博工料等項約需銀七萬兩亟請飭部無論何款先行撥撥一面具奏一面派員赴部請解以濟要需倘不敷用再行隨時奏請統俟完竣詳細據實造冊報部等語臣等查蒙古哈薩克族類繁多雜處已久且屢被兵荒困苦已極今欲勘分邊界必先籌安撫之資

夫際此時勢多艱庫儲未裕近年由部墊發各處軍餉現在欠還者已積有四百餘萬兩之多若仍紛紛請撥庫款實有不支之勢然數其所奏購散牛羊爲謀生之計賞給磚茶爲日用之需以及勘分境界隨帶文武員弁兵役人等糈帶口糧雇備駝馬脚價並川資費號建立牌博工料等項所費不貲自係實在情形臣等公同商酌庫款現雖支絀然事關邊務不得不先其所急擬請暫由部庫另款存儲四成洋稅項下提撥銀七萬兩以資應用如蒙 俞允當俟該將軍等派員領取時即由臣部制知銀庫照數給發總理各國事務衙門查勘分科境應將蒙哈各民豫籌安撫業經臣衙門據情照會俄國使臣緩期分界並知照該將軍等妥辦在案茲既由戶部准撥四成洋稅以爲安撫之需該將軍等自應懷遵前奉 諭旨妥速辦理以重界務而符新約並請 飭令該將軍等共體時艱撙節動用不得恃庫儲爲有蓄之款冀再續撥倘庫款不繼以致貽誤事機關繫殊非淺鮮至採買牛羊磚茶數目並時估價銀若干均當切實辦辦隨時奏明報部立案以備查覈而節虛糜再此摺係戶部主稿會同總理各國事務衙門辦理合併陳明得 旨如所議行○壬辰何璟張兆棟奏閩離自同治四年改行票運課耗釐三項並徵法簡課增果能今昔時勢相同則恪守成規自可久行不敝無如時勢不同竟有未能逆料者溯自改票之初適值鄰疆多事江浙粵東鹽政未復茹淡之民悉取給於閩地販鹽獲利數倍不慮無銷祇慮無票是以初

屆徵收課耗鹽三項共銀四十萬五千三百餘兩今則承平日久引界各清銷路奇絀此籌銷時勢之不同也閩省各場濱海滴水成鹽易徒貪利販私趨之若鶩往時軍務未清勁旅雲集防匪兼可防私是以私梟潛跡今則地方安謐各屬駐勇無多販私張膽堵難徧堵防不勝防閩商本薄資微又未能厚集哨力處處梭巡此緝私時勢之不同也初改票運截清陳引商販待票行鹽又得會逢其適隨運隨銷隨銷隨完無虞帶欠今則歲有定額時復艱難上屆之票尙未運銷下屆之票又須接買更兼勸買額外有票無銷日積月累竟有積票至數十萬兩未赴場捆運者官運代辦倒商懸額已買未運之票且積至六十萬兩良以票運奏定章程買票時先完一半課釐餘俟鹽運到幫銷清再繳夫課從鹽出鹽待銷疏銷滯課絀自然之理以故運票課釐自第三屆起雖按屆照數清完而頻年拖欠遞積遞遲官運尤甚蓋官運販銷鹽斤有似民間經紀必須將存貨現銀併計以定盈絀與州縣丁耗專以現銀解司爲準者情形本不相同故奏銷時截清屆限以現銀計雖未清完以積票存鹽合計則並無短絀惟必須票運鹽銷始得現銀歸補報撥官運情形如此商幫亦不能不稍示通融以免藉口此買票繳課時勢之不同也綜此三端而論不能議昔日改票之非實則由今日時勢之變值此幫局瀕危之際如再不思變通一旦運停商倒全綱卽有渙散之虞查前當改票之時前任鹽法道吳大廷議詳各商販應完課銀一兩隨徵釐銀五

錢原爲暫充軍餉起見計邵武等縣官運商販二十三幫年額應徵釐金銀一十萬四千七百四十九兩六錢除第三屆起准減二成銀二萬九百四十九兩零外每屆尙應徵八成銀八萬三千七百九十九兩零同治十一年前兼署督臣文煜及十二年前督臣李鶴年均經會同前撫臣王凱奏先後奏請自八屆起再行酌減三成以紓商力奉部議駁自八屆起至現辦十七屆止又歷十屆官商年額應完課耗釐銀三十九萬八千一百五十九兩零又須勒令認買額外販票以顧道庫雜支總須徵至四十萬兩以上方敷造報此十年中又加水患頻仍災來意外請緩徵課釐請補給失票又請展緩奏銷雖多方調劑而負重難支終不濟事官商交累籌補殊難復據商販鄒安遠等赴道屢稟顯厥情形籲求全免鹽釐藉舒殘喘冒詞懇切實理真情據福建鹽法道解煜會同藩司沈保靖具詳請將西路之邵武光澤建甯泰甯建安甌甯建陽崇安南平順昌將樂龍溪永安沙縣古田縣之黃田埠並龍巖漳平甯陽及南路之閩縣侯官羅源寧江閩清等二十三幫應徵八成釐金如照該商等所請全免撥餉有關斷難照准惟有懇請自十八屆起查照額徵十成釐數再爲量減二成庶於恤商之中仍寓兼籌庫欸之意其餘縣澳等大小數十幫尙能勉強支持者仍當照舊收徵全釐以應額支會詳請奏前來臣等查改票之始籌議加納鹽釐本係權充軍餉許俟試辦一年另行酌籌並未明言著爲定額計今已歷十七屆之久官運商幫疲憊如

此等目擊情形毫無捏飾合無仰懇 天恩俯念閩商本微課重病疾已深准如該司道等所議將西路邵武等二十三幫額徵十成鹽釐除已減二成外自十八屆為始再為量減二成以恤商艱而資補救下戶部議奏○壬寅會國荃等奏廣東省籌辦海防所有修築虎門省河大黃灣等處礮臺以及紳士蔡信珩捐造土臺各情形經前督臣張樹聲會同臣裕寬於光緒八年三月間繕摺具奏並將廣東陽江鎮總兵黃廷彪督修大黃灣礮臺北牆工築不堅應另行拆修及將用過工費勒令黃廷彪如數賠繳各緣由另片陳明隨准部咨令將修築各礮臺經費詳細報查經卽札飭廣東督後兼辦海防總局會同報銷總局遵照辦理嗣因大黃灣礮臺北牆工程用過工費銀兩該總兵黃廷彪如數賠繳清楚復經臣等附片奏明各在案茲據海後報銷兩總局司道詳請廣東省修築虎門威遠下橫檔礮臺兩座省河中流砥柱礮臺一座大黃灣綏定鎮南礮臺兩座又添築定洋綏遠定功永固保安土臺五座又潮州汕頭添築土臺一座均於光緒七年十二月間一律工竣除定洋土臺一座係山紳士蔡信珩捐資建造並大黃灣礮臺北牆續經拆修工費銀兩已由該總兵黃廷彪賠繳清楚均毋庸核計外所有虎門省河大黃灣等處礮臺五座土臺四座汕頭土臺一座統共支過經費銀九十二萬六千餘兩自應造冊報銷惟此次建築各礮臺均係參用西法所用鐵板紅毛坭等物購自外洋既難繩以例價而鑲合砌築則用機器工匠

亦與部定做法不同現在若將修築各礮臺工程按照定例造報必於實支經費數目不克相符若率就例文通融開報又非核實辦理之道查光緒八年十一月二十三日奉准戶部奏定章程各省軍需費後未經報銷各案向來開單者截至光緒八年十二月止照舊開單廣東限九箇月奏報到部等語又廣東省於同治年間設立機器局用過一切經費先經開單奏報奉准部覆有案今修築虎門省河大黃潛等處礮臺核與機器局事同一律應請援照部章成案據實開單專案奏銷詳請分別奏咨以便照案辦理並聲明此次籌辦海防各礮臺皆配洋礮各營守臺勇丁所用快鎗均係先後赴外洋購辦等由前來臣等覆核無異除飭令督同局員核實開報並咨明戶兵工三部查照外謹合詞恭摺具陳下部知之○癸卯 上諭 奏先嚴行禮○甲辰予故江蘇巡撫黎培敬於清淮地方建祠○乙巳諭軍機大臣等前有旨諭令李鴻章即回北洋大臣署任現聞法人在越勢甚波瀾越南屏弱之邦藎食不已難以圖存該國列在藩封不能不為保護且滇粵各省壤地相接倘藩籬一撤後患何可勝言疊經諭令曾國荃等妥籌備禦惟此事操縱緩急必須相機因應亟須有威望素著通達事變之大臣前往籌辦乃可振軍威而顧大局三省防軍進止亦得有所稟承著派李鴻章迅速前往廣東督辦越南事宜所有廣東廣西雲南防軍均應調何路兵勇前往著該大臣妥籌具奏金革毋避百有明訓李鴻章公忠體國定能仰副

朝廷倚任之重星馳前往相度機宜妥為籌辦將起程日期及籌辦情形迅即奏聞以紓廑系將此由六百里密諭知之○丁未追予故原任直隸天津河間府兵備道吳毓蘭照軍營立功後積勞病故例從優議卹並於揚州府城建祠戰功政蹟令國史館立傳○諭岑毓英等奏特參不能保護教民之知縣洪升請旨暫行革職並委員查辦一摺此事情節重大究竟鄉民與教民因何起衅該處團民究係何人為首必須查明實在情形確切究辦著督令派往之道員鍾念祖迅速確查務將滋事首要各犯悉數拏獲按律治罪現值法越搆衅之時出此重案尤應及早妥辦免生枝節不得稍涉徇隱○己酉盛京工部侍郎興恩以病免

皇四月辛亥朔諭錫珍奏請將已革侍郎寶廷葉瑷錄用湖北荆宜施道于蔭霖改用京秩等語前因寶廷尙屬敢言是以不次超擢簡授侍郎乃於差次不知檢束自蹈愆尤當照部議革職寶廷等所有應得至獲咎人員葉瑷錄用其權操之自上錫珍何得遽為乞恩于蔭霖以京察一等簡授道員正所以資歷練朝廷量材授職京外皆須得人所謂改授京秩之處亦屬非是錫珍著傳旨申飭○樓舉莒奏我朝加惠商民崇文門稅則本有定章嘉慶五年奉上諭上年將關稅贏餘酌加裁減原以體恤行旅加惠商民在各關監督等自應仰體朕恤商惠民之意不敢於正稅之外復有勒索擾累之事現在蘆溝橋彰儀

門經管稅局人役竟有訛索過往行人飯錢等事業經分別懲治釐轍之下尙敢如此其餘各省關稅種種情弊不問可知嗣後京外各關稅局如再有訛索飯錢擾累等事不獨將所派之巡役家人等從重治罪並將各關監督一體嚴辦示懲不稍寬貸將此通諭知之欽此又道光二年奉 上諭御史許乃濟奏請嚴禁崇文門稅局需索蠹弊一摺所奏甚是各關徵稅科則責令該管官詳刊木榜豎立關口街市並令地方官將稅則刊刻頒發該監督遵照定例於崇文門及分口巡查之蘆溝橋東壩板橋海淀等處一律添設木榜仍著順天府刊刷科則俾眾咸知並責成巡視五城御史隨時前往認真稽察如有濫行需索擾及行旅情事卽行據實參奏不得日久視為具文務期革除積弊以懲關蠹而便商旅欽此 聖訓煌煌何等森嚴乃近日滋弊如故行李往來不論有無貨物一概留難勒索甚且揚言每衣箱一隻稅銀四兩商民受其荼毒敢怒而不敢言臣維 國家 深仁厚澤二百餘年被此等人斷傷元氣其虎狼之性兇惡之形真堪髮指然爲虎狼者巡役而縱虎狼者監督也相應請 旨飭查將該監督及巡役等從嚴懲辦並請 旨申明勸章詳刊木榜頒發稅則庶商賈咸有遵守而中飽之弊可杜矣又奏臣風聞浙江舉人趙光第本年三月初八日黎明由南西門進城突來多人攔車訛索口稱監督家人謂現定新例凡進城者皆須報効該舉人急欲入場給以制錢數百文求免耽擱而該丁役等更肆咆哮百端恐嚇

盤稱將主僕鎖押遲至未刻仍給以銀錢始得放行及入內城而貢院已扃閉矣傳說之下士論洶洶咸
懷不平臣伏讀同治六年 上諭候補內閣學士鍾佩賢奏請嚴禁崇文門稅局需索一摺朝廷培養士
子體恤惟恐不周該官役竟敢違例婪索尤屬可惡著該監督等申明定例如有留難勒索情弊卽著查
明懲辦並嚴禁報効名目等因欽此又同治九年 上諭御史劉國光奏請飭嚴禁各關稅衙門留難需
索等語該吏役等需索不遂任意留難致令各士子沿途節阻滯貽誤場期殊失朝廷優待士子之意
等因欽此竊思公車雲集之時該監督等宜如何嚴束丁役乃竟任意縱橫因訛索而欺陵之以刻不可
緩之時而猶恣意留難貽誤場期其非所以體 朝廷養育人才之厚意也夫留難乃丁役之故習平日
被其訛索者不可枚舉而士子特其一也士子之被其訛索者亦不可枚舉而貽誤場期之趙光第特其
一也以誤一士子之功名而招千萬人不平之議論是違例勒捐丁役之罪小而不能仰體 聖懷以阻
士氣監督之罪大且職司糾彈既有所聞相應請 旨一併飭查懲辦又奏向來稽查稅務之外另設海
巡原所以杜偷漏也但海巡半出於密棍藉端訛索無所不爲且有並非海巡冒充海巡者平日兇狠情
形攪累商民肆無忌憚事前則飽其慾壑事後則無可根究皆以其真僞不分散漫無稽之所致也欲絕
其弊應請 旨飭下該衙門按名給發號衣腰牌卽書名其上設以後再有訛索准商民指名稟究則海

巡之真僞立分而訛案之弊可思矣京員人等効力 皇家不能不攜帶家眷而家眷進城訛案留難之風尤甚殊非所以養存廉恥也相應請 旨飭下該衙門以後凡有京員家眷進城說明何官者立即放行不得稍稽片刻則婦女無露面之羞而 國家之名節益重矣至鄉會士子進城如果此次嚴行整頓當不至再有勒索阻難之弊但崇文門爲 國家稅務之一豈能絕無查察應請 旨以後凡當鄉會試年分各士子進京到城呈驗文書者立時放行不准訛案分文其餘仍嚴密稽查則商民無可冒充而國課不致減色矣 上諭給事中樓譽奏參崇文門蠹弊及請分別整頓及留難會試舉人請飭懲辦各摺片崇文門稅務迭經申諭嚴禁搜累該監督自當實力奉行茲據樓譽奏謂近日滋弊如故行李往來不論有無貨物一概留難勒索等語著該監督即行查明嚴加約束剔除蠹弊應試士子入都呈驗文書立刻放行不准絲毫需索以示體恤其官民人等攜帶眷屬尤不准稍有留難嗣後如有再違例勒捐情事立即從嚴參辦所請給發巡役號衣腰牌以辨真僞並著該監督酌核辦理至所稱浙江舉人趙光第於三月初八日由南西門進城突被多人訛案致誤試期一節士子入都自應恪守定章先期納卷何得於點名之日始行到京其不能入場係屬自誤至有無訛案之處著該監督查明辦理○諭甘肅西甯鎮總兵何作霖雲南普洱鎮總兵王東發貴州古州鎮總兵江忠湖均著開缺送部引見○張之洞奏

湘毅軍現經裁撤通計山西一省鴈門關以內止有精兵營練軍一千名而步隊兩營均在四天門一帶修工省垣腹地兵力過薄竊惟歷奉 諭旨整頓練軍誠爲治戎節餉要道擬卽先從省標辦起茲於臣標左右兩營額兵內挑選步隊一百名馬隊五十名共一百五十名作爲撫標親軍營務擇壯健樸勇之士不及格者汰募以足之率以管帶總哨官一員副哨官二員嚴申紀律勒加訓練綠營積習故套掃除務盡以爲整頓通省綠營練軍之漸自二月內議裁湘軍之日卽令舉辦今據報於三月初一日成軍所需練餉練乾悉照練軍馬步親兵章程又奏湘毅軍馬步四營自前撫臣曾國荃赴山海關留督巡防查該軍需餉浩繁且與此間風土人情不甚相習現經欽奉 諭旨裁勇節餉自應卽時遣撤該軍自前年秋間派修四天門道路承修地段刻已告竣未訖之工責成練軍辦理計此項正勇一千名並各項人夫經臣派委候補道吳其復記名總兵何鳴高督率原派營哨各官統帶該軍於三月初二日啟行取道天津載以輪船溯江至鄂回湘遣撤以免蔓延逗遛已咨照署北洋大臣直隸督臣張樹聲飭招商局雇備輪船所需價值由督籌給查同治八年遣撤前臬司陳澍所部湘軍舊案係發給兩月餉項以到湘之日作爲遣撤之日此次湘軍在晉累年修工巡緝尙屬勤勞不懈自應比照成案量爲加優當經查照向章發給三箇月口糧以示犒獎俾得及早適行惟此軍駐晉有年湘中聞弁散勇聞風踵至冀得收留以及

渝關不歸之衆察龍罷道之軍紛紛投至若不設法資遣則止軍既撤游勇徒存必致隨地漂流無所統紀重爲民害因飭詳細查明此項開弁散勇約共三百餘人已編造名籍酌賞口糧飭令吳其復等率之一律附船南歸報聞○壬子諭御史陳啟泰等奏四月初一日 太廟時享分獻官散秩大臣文壽行禮未能如儀請量予懲處等語文壽著交部議處○內辰以譚上連爲甘肅西甯鎮總兵何秀林爲雲南普洱鎮總兵蕭盛富爲貴州古州鎮總兵○頒給廣西鬱林州寒山廟匾額○丁巳諭軍機大臣等李鴻章奏豫籌越南邊防事宜各摺片前因越南情形緊迫諭令李鴻章前往廣東籌辦茲據陳奏各情所籌亦甚周密事機旦夕變遷惟在隨時權衡辦理該大臣現由金陵前赴上海卽著暫在上海駐紮統籌全局將兵事餉事豫爲布置密度機宜再定進止著將籌辦情形隨時奏聞其緊要事件並著由電信寄知總理各國事務衙門轉奏以期迅速原摺片留中將此由六百里密諭知之○岑毓英等奏納樓土官嫡派絕嗣請將土司所管八里三猛地方改爲土舍卽擇該土官親支蕃衛本等四人分管並請將光緒七年年底以前積欠錢糧及光緒八九十三年錢糧分別豁免免徵 上諭納樓地方應徵錢糧著照所請分別豁免免徵所請將土官改爲土舍擇人分管之處著該部議奏著部議准擬奏得 旨允行○諭軍機大臣等現聞法人在越南境內勢更猖獗滇粵邊防尤屬喫緊廣東廉瓊一帶前派吳全美統帶兵輪船

認真操練該處洋面近接越境必應極力整飭水師以壯聲勢著會國荃裕寬飭令吳全美移近越洋巡哨藉資援應○已未會國荃奏廣東內河外海水路紛歧捕務緊要經前督撫臣陸續購造大小輪船分配員弁管帶巡防業經先後奏明並咨部核覆在案茲據廣東善後兼辦海防總局會同全省營務處司道詳稱粵省自派撥大小輪船在於各處分駐巡防盜匪頗為斂戢惟內河之肇慶河面上通廣西下達省河綿亙六百餘里支港最多雖經設有小號巡船二十餘艘查緝仍難周密又大鵬協管轄之九龍一帶洋面界連香港為華洋交錯之區其間支河分港水淺路歧大號輪船不能行走以上兩處均須添派淡水輪船捕盜緝私庶期得力惟從前購造大小各輪船均經分撥各處擇要巡緝礙難抽調當經詳准飭行軍火局購買物料於光緒八年正月內造竣輪船一號取名肇安撥交肇慶協派撥弁勇在於肇慶一帶河面巡緝又由機器局購買物料於八年六月內造竣輪船一號取名南國撥交大鵬協派撥弁勇在於九龍一帶洋面巡緝該輪船兩號均與從前製造之靖安橫海宣威揚武翔雲小輪船五號長寬丈尺相等內肇安輪船支過工料價值銀七千八百四十六兩一錢五分南國輪船支過工料價值銀九千四百一十五兩三錢八分節據委員驗收俱係工堅料實駕駛靈捷查本省前此購造各號輪船價值支過款項銀數均經詳請奏明咨部核覆在案茲肇安南國兩號輪船均係仿照外洋式樣製造其機輪槳

旋等項銅鐵木料多從外洋採購並無例價可循所有此次製造肇安南國兩號輪船支過工料價值並每月需支薪糧等銀應請援案奏明一併在於洋藥撥金及督後經費項下支銷等由並將該兩號輪船長寬丈尺配駕官弁及各色人等名額支給薪糧銀數造具清冊詳請奏咨前來當經臣等親詣驗明肇安南國兩號輪船係工料精堅駛行靈捷其一切物料多從外洋購買難以例價相繩惟均係核實開支並無浮冒下部知之○庚申曾國荃等奏臣等於光緒九年正月初二日承准軍機大臣字寄光緒八年十二月初四日奉 上諭兵部奏請飭裁各省防勇確核兵額以節餉需一摺著該大臣督撫等各就該省情形悉心酌度奏明辦理等因欽此仰見 朝廷慮念時艱慎重度支臣等跪誦之餘奚勝惶悚遵即恭錄轉行欽遵一面督同司道並咨商水師陸路兩提臣悉心妥議通盤籌畫念經費之支絀裁勇節餉固未可置之緩圖而以粵東地險民竄誠剿防似亦未便遽行裁撤謹就現在情形敬為 皇太后 皇上縷晰陳之伏查廣東各營勇丁自軍務平定以後或派往各處剿捕或分隊駐守邊隅隨募隨撤並無一定誠以地處人稠輻輳遼闊水路則汪洋巨海港汊紛歧陸路則林密山深路徑叢雜舉凡查辦匪鄉搜捕伏莽勢不能不酌留勇營以助兵力之不逮光緒四年前督臣劉坤一前撫臣張兆棟於奏報實存水陸各勇九千餘名摺內聲明易勇為兵裁撤輪拖巡船水勇二千三百餘名拔補兵額每年節省

銀四萬餘兩原擬俟地方一律安謐即將各勇逐漸裁撤以節糜費洎夫光緒六年籌辦海防前督臣張樹聲以防地空虛於沿海沙民蛋戶挑募精壯二千人編立成軍分紮虎門省河各廠要認真訓練以備不虞後因各路無接應之師飭令前署廣東陸路提督臣楊玉科添募壯勇一千人連原部惠清營勇五百人併力扼守虎門並令署南韶連鎮總兵鄭紹忠添募壯勇一千人連原部安勇一千人合營操練以爲省河各路之援均經奏明在案此舊募各營勇丁也上年四月間越南有事欽州一帶壤地相連經臣裕寬在兼署總督任內飭令記名提督黃得勝召募勁勇一千人駐防欽州以固邊圉此項勇丁現因高州會匪竄動調赴該郡會同候補道周炳勳查辦搜捕事宜並由周炳勳報募親兵一百名以資調遣又有記名總兵鄧安邦所部勇丁頗稱得力上年冬間臣等以時屆歲暮盜匪充斥鄧安邦所帶勇丁無多不敷分布飭令酌量添募精壯連原部共足一千人隨時訓練以備緩急之需近皆散布於廣州府屬各縣踴躍盜蹤訪拿匪犯此續募各營勇丁也刻下海防雖已漸鬆辦理略有頭緒第粵東民情浮動防範稍有疏虞胥小卽乘機竊發如上年十二月間高州府屬梅麓地方有匪徒聚眾拜會約期倡亂並分黨潛赴電白縣城劫獄滋事一時東西兩省界連各州縣均爲震動現雖剿捕迅速首惡漸次就擒而黨與尙多在逃根株未泯絕此外惠州府屬查辦匪鄉瓊州府屬剿辦黎匪巡防喫緊正值需勇調遣至於

水陸各標協營兵自裁汰三成後或經挑選訓練或已易勇爲兵所有存營兵丁僅足敷防汛之用未便再行裁補現值時事多艱庫款奇絀且疊奉 諭旨諄諄等具有天良敢不力圖撙節勉顧大局無如審時度勢實未敢輕言裁撤計惟有暫緩撤防庶幾固我藩籬稍壯聲威於萬一仍俟防務漸定地方又安再當隨時酌量體察奏明辦理據廣東督後總局司道具詳請奏前來除飭將現存勇數及管帶官員各駐防處所分別造冊送部查核並咨戶兵二部查照外所有廣東省現存勇丁一時尙難裁減緣由謹合詞具陳下部知之○李鶴年奏 臣於督審要案拘守例文一時廷忽負疚良深乃蒙 聖慈不加重譴僅予銷職撫躬自省愧悔方深何敢片語妄陳再瀆 宸聽惟 臣受 恩深重犬馬懼忱苟利國家仍不敢稍安緘默此案現經 聖明訓示先後承審各官辦理錯誤咎實難辭第刑部將王樹汶改爲徒罪 臣竊有爲綱紀惜者敢敬陳之查王樹汶一犯爲胡廣得看守衣服時年已十八與十五歲以下無知被誘者不同更與良民被擄上船爲洋盜服役汪洋大海脫身無路者迥異例載把風接喊等犯雖未分贓亦屬同惡相濟照首盜問擬上年十二月間刑部奏明訊實該犯供稱胡廣得領至一廟見有五六十人又續來多人聽胡廣得說是去搶人又供不一會胡廣得搶得贓物跑來往返情形一一吐露不得謂未知搶劫緣由既知搶劫若果王樹汶不甘爲盜則於看守衣服之時卽當逃避既不逃避卽是甘心爲盜非

同惡相濟而何例無看守衣服專條則擬以把風接賊與首盜皆斬之罪似不得謂非遵守例文設使當時不照把風接賊定擬又恐刑部加以巧立名目曲爲開脫之咎此承審各官拘守定例之由來也至於胡體浚之有無於王樹汶罪名無關出入卽另有其人亦無解於王樹汶之聽從上盜若謂該犯年紀尙小程孤堆與之同歲程孤堆王牢天皆已駢首伏誅而該犯僅科徒罪奉旨不准減免否則竟爲無事之人矣凡此皆不免滋人疑議爲臣前奏所已及案經奏結自無枉縱而臣茲所慮者誠恐此案宣布中外問刑衙門不能詳細體察誤會懷疑於承審盜案無所適從必至變本加厲任意重輕巧爲開脫將盜風益熾 憲典何存關係殊非淺鮮伏查同治九年新例係申明不分首從皆斬例也近來官屢請分別首從辦理皆經刑部議駁今刑部將該犯擬徒是又分首從也令甲所頒必須顯若畫一始不失明慎用刑之道不揣冒昧擬懇 天恩勅下大學士九卿將劫盜新例妥議具奏或卽自此分別首從辦理俾得折衷一是以持情法之平庶各省承審盜案之員不至無所措手天下幸甚臣不勝戰慄屏營之至 上諭河南王樹汶一案業經刑部奏結茲據李鶴年奏強盜案內例無看守衣服專條請飭妥議罪名等語著都察院堂官會同刑部詳晰妥議具奏○辛酉諭前據給事中鄧承修奏參修撰黃思永及廣東候補知府方功惠各款當諭令江蘇廣東督撫確查茲據左宗棠會同岑等先後查明具奏據情黃思

永並無續營獵劣實跡方功惠亦無重利盤剝官聲猥鄙等情惟黃思永在上海置買住房一所託伊戚朱錫康經手朱錫康復自買房屋兩處上年查姚寶勳夥置洋房一案並無黃思永股本在內其由姚姓代取房租係朱錫康轉詭託黃思永雖由一時失於檢查咎實難辭等語黃思永著交部議處○壬戌鍾佩賢奏盜犯得例本有情有可原免死發遣之條自同治九年續纂新例把風接賊等犯照爲首一律問擬不得以情有可原量爲末減倘地方官另設名目曲意開脫照該盜例參處在當日部臣定議自因盜風日熾非從嚴懲辦不足以禁遏亂萌十餘年來臣工屢有請復舊例者終以盜風未息議格不行伏思地方盜案全在地方官平日稽查防範臨時緝捕認真果能有犯必獲即照舊例辦理已足使奸究斂跡人知畏法無如近來各省因循疲玩地方官平日講求弭盜之方者甚鮮迨盜案迭出茫無措手捕務日就廢弛甚且縱容竊役通賊聚盜包庇分贓或妄拿平民私指教供致良懦被誣因渠漏網間或捕得匪黨數人卽指爲盜首其實首盜早已遠颺大約近年搶劫盜案人喊全獲者十不一二羣民何所顧忌而不爲盜此雖嚴立科條祇屬空言豈能生其畏懼乎然則盜風之熾由於弭盜之無方捕盜之不力由於定例不嚴也新例所云把風接賊等犯等之一字係連誘脅隨行上盜及行劫止一次者兩事而言合之把風接賊而爲三三者之中惟誘脅隨行情罪較輕蓋既云誘脅則非甘心爲盜可知概予誅誅不

無可議往往愚民被人誘脅誤罹重辟格於新例難邀一綫之原卽如近者刑部奏結河南王樹汶一案該犯黑夜隨衆行至曠野衆人脫衣令其看守等候此等情形是胡愼得等之搶劫該犯未必不知謂其隨行上盜則實止在曠野代盜看守衣服謂其未隨行上盜則已隨衆行至中途與盜合夥並未退卻幸而盜衆在曠野脫衣耳假使行至寨門脫衣令其看守則與程孤堆等同在一處從何區別但平心而論該犯甫離家門卽被誘脅不能自脫既未同謀亦未分贓揆諸情理實不應死刑部以王樹汶僅止代盜看守衣服例無治罪專條比例問擬杖徒而王樹汶之冤始害臣所慮者天下之大盜案之多如王樹汶之冤者豈止一人敲朴餘喘自分必死能臨刑呼冤者有幾人乎卽或有之刑部能逐案提京而親鞫之乎卽使提審平反而外省未必不以新例藉口曰例不准另設名目曲意開脫我何敢比附他律干諱盜之議河南省於王樹汶一案特以掩飾繡縫局內鍛鍊繡耳設當時能將實情審出據實申詳坐王樹汶以脅誘隨行上盜之罪聲明該犯雖未同抵盜所而隨行已至中途代盜看守衣服例無治罪專條不敢另設名目應否仍照新例定擬如此疊敘達部恐難遽斥其非卽王樹汶之罪名生死出入亦尙煩擬議矣新例之有窒礙於此可見臣愚以爲此時縱未能盡復舊例似宜將被人誘脅隨行上盜一條先改從舊例通行各省凡獲盜犯審明實係初次被人誘脅隨行上盜並非甘心入夥亦未分贓供認確鑿可

憑者准照舊例聲明情有可原免死發遣以仰副 聖主法外施仁之意應請 飭下刑部妥議酌改期於允協至各省辦理盜案固多因地制宜本有情罪重大就地正法之例仍可並行不悖總之欲息盜風以保甲緝捕為要務以恤民課吏為本原而尤在督撫大吏之不避嫌怨隨時整頓固非徒恃新例從嚴便可消除強暴也 上諭太僕寺少卿鍾佩賢奏新例盜犯罪名請飭議復舊例一摺著都察院堂官會同刑部歸入李鶴年前奏一併妥議具奏○甲子陳啟泰奏竊維吏治壞於冗員自 特旨飭停捐輸以清積弊近復議停分發以遏其流從此仕路疏通各省漸有起色然本之亂者未必不治未有儒術壞於先而治術獨能善於其後者也故請求吏治當自整飭學校始謹就管見所及為我 皇太后 皇上陳之一學額宜酌留也府州縣學原設定額最為適中然尙有不敷取進之時故條例有任缺毋濫之語捐輸增廣以來冒濫無等往往一縣取至七八十名次亦五六十名較正額加多過倍學臣踏常獎故惟務見好士林其則利其規費之多罔顧名器之獎兼收並蓄冗濫實多庠序之間幾不可問今議予以限制學臣按試按照各處錄送人數以州縣之大小定入學之多寡或百名或八十名或六十名始准取進一名人不及數即留其額將來文風漸盛應試人多再為補足如係兵燹之餘災荒之處則由學政臨時酌定奏明辦理其錄送人數概由各督撫彙齊咨部以備查核俾屆選拔之期舊例屢增附過百餘名始准

拔取一名如荒僻州縣實無可貢成均者卽無須勉強充數庶幾取材核實眞品可以見重矣一教官宜澄叙也廣文職司訓迪關係士風最重近來尸祿之員但知鬻案印卷爭較錙銖常有抑勒罔罔之事上下交失廉恥蕩然尙望其講明學規薰陶士類乎況自捐納一開品流甚雜教官中竟有目不識書之人入學食餽本由槍替而得納資選缺勢必取盈庇縱劣生干預詞訟皆意計中事應請飭部將教職捐納一班以巡檢主簿對品佐雜各官改選其有大挑五貢例應銓選但加捐本班先等名目花樣者改爲加級紀錄已得缺者督撫學政隨時認真察看不職者概予沙汰如實有經明行修之儒准學政題請補缺從前惠士奇督學廣東將翁延寶題補韶州府教授付奉世宗憲皇帝特旨允准士論榮之今若稍予變通將學官無慚博士之才多士亦交修學行矣一書院宜核實也山林主講實與膠庠之設教相輔而行教官月選而來不能定其品學書院山長則皆地方官商同紳士聘請必衆論交孚然後延主講席故最宜得人近日請託干求頗滋流弊勒提公項分送乾修以士人膏火之資供長吏應酬之費課程規則概置不修徒有書院之名並無作育之實無怪乎人才消乏習俗卑汚今欲革此陋風實意培植莫若禁教之人悉聽地方官紳自行延訪各該上司不准壓薦私人垂爲厲禁庶幾名實相副師道立而吾人多益廣聖主作人之治矣一學政宜慎簡也士子風尙惟視學政爲轉移學政得人則凡文教所關在

在均收實效邇來薦是選者固不乏崇尙實學整頓士習之人然奔鄙庸陋之徒亦時或忝膺簡任甚至短喪虧行痼疾極深者均濫廁其間幾何不敗壞士風玷辱使命以後學更替年滿到京擬請朝廷速加考察如果聲名平常量予懲處一二以警其餘庶乎師表克端文風丕振優序無虞廢弛矣以上四條似皆與吏事無涉然今日之士子卽異日之長官不杜其僥倖之途則真才無由自見不慎乎師儒之選則學術先已不端猶冀其砥礪廉隅有裨政事無是理也故曰講求吏治當自整飭學校始上諭御史陳啟泰奏請整飭學校以端吏治之本一摺各省書院爲培植人材而設必須院長得人方足以資模楷若如所奏請託干求流弊滋多以致有名無實嗣後書院院長均著由地方官紳自行延訪品學兼優之人各該上司概不准徇情壓薦以杜弊端學政職司文教士子風尙視爲轉移膺是選者必能束身砥行振興實學方爲無忝厥職各省學政向由該省督撫於年終密陳考語嗣後各省督撫務當認真察查出其切實考語具奏倘有聲名平常不能稱職之員並不據實奏聞一經發覺定惟該督撫是問至該御史所陳酌留學額澄敘教官兩條著該部議奏○丁卯卞寶第奏前准刑部咨開光緒七年九月初一日奉上諭御史蕭韶奏湖南耒陽縣有產煤處土名煤窿奸徒誘買窮民作工入窿等因欽此經前撫臣李明墀恭錄行司轉飭衡州府實力查禁旋據衡州府知府翁曾桂遵派熟習鹽情之紳士清泉縣

舉人譚炳章桂陽州舉人歐陽霖前往協同先後署理耒陽縣知縣蔣恩海曾敘効澈底嚴查業經拔出之窮民一百四十餘人一面傳解各僦戶到府查訊本年正月該府翁曾桂來省面稟情形臣以奸徒殘忍漁利積弊已深亟應格遵諭旨嚴定章程以期永遠禁止當飭妥議去後茲據稟稱郡屬耒陽縣境東南產煤商人雲集煤條大小數百處挖取年久煤潛水底必先將水車盡始能開採僦戶用有管水夫之頭人名曰水承行多係近地奸民充當窮兇極惡並串同地痞設立青龍會積成巨款局賭賣烟誘騙窮民墮其術中因而重利盤剝又商串酒館飯店故昂其值恣意取盈追窮民負欠纍纍逼令賣身入墜其人無錢還債不得已飲泣允從又聞有平空哄騙強捉客民之事水承行築有土室幽暗深邃外立木棚挨篋處僅留一竅出入啟閉山水承行主之名曰設鼓將誘買哄騙強捉之人關禁鼓內名曰水蝦蟆概行剝脫衣服專令輪班車水晝夜不休飢寒不恤稍倦則鞭毆其背欲逃則刀刺其足且篋內隆寒氣盛工作又奇苦非常故弱者往往半月即因之畢命壯者不數月亦足爛腹腫不容休息不給醫藥坐視其斃尤可慘者每年春間停工水蝦蟆幸而苟延無恙水承行仍將其留禁鼓內以備將來車水名曰養老米內外扞格消息不通每歲每條水蝦蟆之受害死者多則數百人少亦數十人隨就山窟掩埋親屬並未聞見無從報驗屢經該地方官不次嚴禁而各僦戶與水承行巧為規避終屬陽奉陰違現經傳集

各隱戶到案諭以永遠禁革水蠟蠟設鼓查老米各名色取其甘結存卷並再密加訪察如仍有誘買關禁前項情事即當從重擬辦倘有矜棍行役包庇等情一併嚴行懲治酌議章程稟請察核具奏前來臣詳加披閱均係實在情形該縣煤廠積弊已久此時若欲一一追究其勢有所不能惟當設法厲禁覓其既往嚴其將來冀以挽頽風而恤民命查例載宛平縣西山門頭溝地方開採煤窰詎誘貧民逼勒入窰關禁不容脫身者照兇惡棍徒例分別首從科斷窰戶知情縱容照知情藏匿罪人律治罪其毆打至斃者仍照謀故關殺各本律問擬等語今未陽縣煤廠誘買窮民關禁與西山煤窰情形相似而按該隱戶故縱水承行凌虐毆打致每歲每條慘斃多命並敢屢禁屢違實屬兇悍兇狠情同光棍較之僅止關閉不容脫身者居心尤為可惡現在雖經嚴查禁革日久或不免故智復萌若僅照謀故關殺各本律問擬殊覺情浮於法惟律例並無作何治罪明文愚民罔知儆懼除將該府所擬章程續加酌核咨送刑部外相應請 旨飭部查核議擬並明定治罪專條俾貧永守遵行 上諭卡寶第奏遵查煤隱奸徒凌虐賤命請飭部嚴定治罪專條一摺據稱湖南未陽縣奸民充當採煤隱戶誘買窮民關禁土室逼令作工並設立各種名目肆行凌虐每歲致斃人命甚多等語奸徒漁利戕害生命實屬兇悍殘忍目無法紀現經卡寶第查明懲辦著即飭令地方官勒石永禁毋得視為具文至此項人犯應如何明定治罪專條著刑

部議奏○戊辰諭向來已革人員例不准帶用頂戴近有仍行帶用者殊屬非是嗣後官員因事降調如曾經賞加頂戴仍准帶用至革職人員概不准其帶用其有棄瑕錄用因案開復及捐復者均不准仍帶前賞頂戴以肅體制○諭軍機大臣等前據李鴻章奏豫籌越南邊防事宜擬赴上海暫駐當諭令統籌全局將兵事餉事豫爲布置並將籌辦情形隨時奏聞法越交涉一事現無定局必須在我者兵力足恃辦理較爲有益刻下滇粵防營兵力甚單自應添撥勁旅以資備禦提督劉銘傳係李鴻章舊部宿將聲望夙著如今其調募數營統帶前赴粵西作爲後路援軍於事能否有濟著李鴻章悉心酌度據實覆陳並卽遵前旨統籌全局迅速具奏將此由五百里密諭知之○已巳畚毓英林肇元奏 肇元於光緒八年九月二十八日准兵部咨鈔議覆御史陳啟泰請酌裁制兵一摺請 旨飭下各省督撫體察情形應如何裁汰酌留悉心妥籌奏明辦理等因奉 旨依議欽此又於光緒九年正月十六日准兵部火票遞到軍機大臣字寄光緒八年十二月初四日奉 上諭兵部奏請裁各省防勇確核兵額以節餉需一摺等因欽此欽遵各在案仰見我 皇上簡核兵實救時節餉至意 臣等曷勝感悚查黔省苗疆原設重兵鎮守額逾三萬承平日久營務廢弛迨至變亂迭生老弱散亡莫可爲用故不得已募勇以濟兵力之窮洎肅清以後前撫 臣黎培敬任內規復制兵五成及 臣毓英前任黔撫時以各營防勇挑補十成足額倣

直隸章程提馬戰兵爲練軍設統帶管帶官駐防要隘不准另設勇營是黔省之兵皆制兵而無防勇矣
顧黔本瘠區向賴各省協餉以養兵乃兵足而餉不足每以缺乏難支時懼拮据之無術而又以苗疆重
地苗患初平不敢輕言裁兵轉滋他患此上舉元前奏有欲裁兵以節餉而實有不可去之兵者也今奉
諭旨飭下各就該省情形悉心酌度奏明辦理臣等就黔再三商酌際此艱難之時而應輟餉濟與
其缺兵食而致譁潰之虞不如裁兵數而歸增節之用謹就各標協營守兵暨練軍營戰兵飭各管官等
認真裁汰二成合計應裁守兵三千二百九十三名戰兵二千九百一十一名以光緒九年二月底止分別
截算給支計每月可共節減餉銀七千六百五十九兩五錢其既裁之兵應補前欠之餉分飭司局竭力
搜羅解交各管官按名散放各遣回籍可許巡邏滋事仍取各營冊報查核須俟三月底始能一律告贖
夫黔省本新復足額之制兵別無另設之防勇訓練節制分布嚴密茲因餉項難籌不得已酌爲裁減仍
當嚴飭操防以收實用亦惟期各省協餉如數撥解源源庶使餉足以養現存之兵不致事急再有另募
之勇此又臣等兢兢遵守 成憲之微忱即迫於事會不敢或渝者也下部知之○林肇元奏 維古之
言兵者有合拳之喻謂舒卷從心也亦有使臂之喻謂指揮如意也不合拳則勢散而不聚無使臂則機
鈍而不靈故失機勢者兵家所忌直隸練軍章程 未知其如何若如黔省章程一營也分守兵爲練營

馬戰爲練軍數各半也練軍仍隸本營名色設官管之亦緣練合一不亂營制之意然營頭有大小之不同卽兵數有多寡之各異設如練軍祇有百餘一營者拘於本營名色各分界限以之守隘則嫌其單薄謀操亦覺其零星倘因事征調又須酌分留守則幾不成隊伍況小營亦繫一官難於大營勢每不能相下營哨薪水應費亦多夫軍以練名當得練之實庶兵精而可用然欲得練之實非變通而整齊之則勢難而機不靈且愚以爲練軍不必仍隸各本營名色祇就撫提四鎮各標營各隸各標分爲六軍名曰貴州某標制兵練軍將本標之大小多寡不一者悉平而一之另立五百人或四百人爲一營分左右中前後等目每管帶每軍立一統帶轄之以撫提兩軍附駐省會爲中樞策應四鎮四軍駐上下游爲四方遊擊任各路巡防之事擇扼要地方結成大營無事則時其訓練嚴明紀律使兵將相習有事則相機征發彼此響應亦氣聯勢合其兵悉如制額其名統以六標去畸零并格之患以變通爲整齊與綠營之制仍不甚相悖而適以相成似足以收合拳使臂之效營既整齊用官亦少卽薪水亦可稍爲撙節報聞○壬申諭劉長佑奏病難速痊懇請開缺回籍就醫一摺劉長佑著准其開缺回籍調理俟病痊後再行來京陛見○浙江巡撫劉秉璋奏上年戶部奏催龍江西新濟甯南北新關一律開徵一案經前撫臣陳士杰查明實在爲難情形奏請照案停止欽奉 諭旨戶部知道欽此欽遵在案本年二月又准戶部咨開行

令查照前次議擬兩江總督左宗棠等奏龍江等關尙難開徵之案妥籌開關以後釐制等因行文前來臣等恭查同治三年十月今大學士前閱浙總督臣左宗棠奏請將北新關暫緩開設按月酌撥釐捐以抵關稅一摺欽奉 上諭所奏切中地方利弊浙省蹂躪已深正宜休養生息以培元氣等因欽此欽遵在案迄今及二十年商民相安無異而於停止釐捐再行設關一層則四民無不周知目下軍務雖平防勇未撤協餉未減釐捐爲餉源所繫萬難停止若再開關徵稅商民必多藉口縱不敢抗完關稅而求減釐金是在意中允之則餉需立絀拂之則設法偷漏此商情之難以釐稅並徵者也又如部文謂安徽鳳陽蕪湖兩關釐稅並徵未聞窒礙一節查安徽開關徵稅釐卡如何歸併釐捐有無短絀臣等未能深知卽以地勢而論各有不同鳳陽蕪湖兩關一在長江適中之地一設淮河扼要之區汶港無多稽查較易若杭州省城地居腹裏而又河港甚多四通八達最易繞越該關分口多至三十餘處皆現設釐捐之地倘讓出要隘俾便設關則其餘各卡盡成虛設近年洋單盛行釐捐日形減色若關卡並立商人成本愈重必致多方趨避百密不敵一疏有損於釐無益於稅此地勢之難以關卡並行者也竊維設關徵稅國家經制有常苟可設法試辦何敢一再煩瀆置之緩圖無如商情地勢今昔不同不得不含籌維新顧全成局卽如閩海浙海兩關以常徵不足額在於新關洋稅項下按年撥補此其明證杭州設關以後稅

鈔無徵無從撥補若內地客商盡由海口行運釐捐大宗奉撥京協各餉勢將無著再四思維實難將稅並徵據布政使德馨會同釐捐總局司道具詳前來惟有仰乞 天恩俯念民艱餉缺准將南北新關暫緩開設欽遵同治三年十月所奉 諭旨俟釐金停止再行循照舊章辦理以裕餉源而恤商民得 旨如所請行○甲戌諭軍機大臣等法人攻破越之南定後現在局勢未定必須演粵兵勢互相聯絡方足以壯聲威吳全美所帶輪船水師前經駛回虎門著會同岑裕寬督飭將各輪船趕緊修竣仍令該提督駛近越南洋面認真巡防嚴現一帶兵力單弱總兵方耀帶兵向橫勇往如今統帶數營前往扼紮是否相宜並著悉心酌度奏明辦理○諭岑毓英奏雲南騰越鎮總兵李文益請假回籍久未到任且平日官聲平常請旨開缺等語李文益著即開缺雲南騰越鎮總兵員缺著張松林補授○以岑毓英為雲南總督張兆棟為福建巡撫○戊寅諭御史黃兆棟奏揀選人員告假太多請飭申明儆章等語此次揀選奉天知府人員告假不到者甚多實屬不成事體亟應嚴定章程以杜取巧之弊著吏部議奏○諭會同奏奏特參營務廢弛之總兵請旨革職一摺廣東高州鎮總兵吳雲成自到任以來於營伍事宜毫無整頓並有虛懸兵額等弊實屬庸劣不職莫雲成著即行革職以示懲儆所遺高州鎮總兵員缺著張得祿補授○陳士杰奏 前在浙江任內承准軍機大臣字寄光緒八年十二月十三日奉 上諭有人奏前山

東巡撫任道鎔欺飾冒濫臬司潘駿文資緣請託請旨查辦懲處一摺著陳士杰於到任後按照所參各節確切查明據實具奏等因欽此。臣到東接印後遵卽派委候補道任海晏候補知府郝植恭候補知縣馬應午等改裝易服前往各處分頭密查去後隨於出省勘河先詣桃園工次踏看合龍大壩沿途復將所參各款逐細查訪採之官紳痞之案牘反覆考究以期水落石出茲據該員等先後稟報前來臣詳加察核並證以紳民公論確據實爲我 皇太后 皇上陳之除原奏請任道鎔山縣令起家工於迎合爲李鴻章所贊前任直隸藩司督查交代苞苴潛通等款非在山東事件無從查辦外如原奏所稱交通請託與臬司潘駿文潛布腹心行蹤甚秘近以桃園大工將該司胞弟列保開復一節查上年桃園決口任道鎔以臬司潘駿文曾辦侯林賈莊工程熟悉河務委派估工籌辦其時水患方殷倉猝布置在在需人差遣當經咨調東河直隸蒞練工作之員來東相助潘駿文適在天津聞之投効前來任道鎔委在西壩當差有札稿存案訪之在工員弁共見其間實係自行投効並非黃緣請託任道鎔與潘駿文分居堂屬商辦公事均可隨時進見無事行蹤甚秘尤爲人所易知又如所稱玩視民瘼官有三月之賑百姓實未見一日之糶糶科每斤發價五文悉歸中飽長清章邱折價分肥其奔走河干運送料物者皆災餘遺漿委員苛駁吹求一節查桃園決口之後先委候補道譚文煥攜帶錢米散放急賑一次嗣又補放曹賑冬

賑各一次每大口京錢一千二百文米一斗小口減半武定府屬被淹在後給發賑兩月其戶口錢數各莊均有榜示核與冊報相同尙無侵蝕至河工稽科每州縣承辦一二百萬斤不等限期迫促地方官無從購覓貳成首事按戶採買則有之價值運腳悉照成案核定不能如小民之自售可以隨時低昂堆垛斤重亦照向例量估多於民間之秤亦或有之官紳尙無中飽長清章邱亦無前項情弊州縣運料到廠委員點收其初正值搶辦需料甚迫何暇苛求惟合龍後前撫臣因所到者已足敷用札飭各屬停運尙有續到之處亦准兌交間有得信自回者原奏謂苟不中秤必令運回或卽因此又如所稱奏報欺朦一節查東省黃河自黃莊至張秋上游南北兩岸堤段綿長數百里向由直東兩省委文武員弁分駐防汛桃園決口係在下游各不相涉去歲上游穩固適屆應保之年未便以相去數百里之下游決口卽置上游出力員弁於不問是以前撫臣照章請獎業經奉 旨允准在案其桃園決口閘當秋汛盛漲之際訪查寬有百餘丈深一二丈不等是以原估較多迨交冬令水勢稍落口門收窄用款亦遂減少所做工程業經臣親勘尙爲堅穩其濟陽濱州之漫水皆由凌汛所致民埝向歸民修前撫臣聞報亦曾飭地方官協同堵築並發賑撫恤奏報尙無欺朦又原奏所稱冒濫保舉道員譚煥文查災不實需索差費知府曹溶澄聲名惡劣身未赴工及前撫臣僅堵桃園一口濟溝南北嶺等處毫無措置各節查譚文煥先辦

賑務旋派爛頭當差後又委在歷城齊河經理各賑曹溶澄一員先派河工收支局繼委濟陽散賑故合龍時均未在工該撫以該員等兩事兼司勞苦較甚故於隨摺案內列保且訪聞譚文煥初辦急賑卹卹援拯不避艱險全活頗多後放曹賑亦能核實惟地保首事人等有因造冊後取組銀二三十文者該員並不知情原參謂需索差費或因此而言曹溶澄所辦濟陽賑務亦能認真但湖北村莊較密小村附於大村散放時有應點來遲者間被中飽首事人等或言委員性急者有之並無惡劣聲名至濟清合龍在桃園之先前撫臣曾經奏報春初決口之處係附近民埵爲凌水所冲南北續決口前撫臣亦經委員勘辦並准提銀二萬兩作爲津貼因時值天寒冰凍未能搶築其實該處工鉅地險堵合殊非易現均由臣體察辦理業經兩次奏報又原奏謂運河道穆特布識字無多家丁幕友咸竊威福濟寧直隸州知州王恩培庸懦無能衙役聚衆械鬪互有殺傷該州閉門不出該撫均置不問捐輸賑災州縣奉有該撫提撥大成作爲皖賑之諭當以取悅於李鴻章等語查運河一缺係歸河臣管轄東省係兼轄耳該道公事本簡穆特布曾任部務多年文理雖未優長而批閱卷牘尙能明晰歷辦漕運亦無貽誤家丁幕友爲數無多訪查均尙安分並無竊作威福實據濟寧州署尙有衙役班房在大堂前聽事捕班總役與皂班總役口角各帶散役出外互毆並未殺傷隨經該州分別稟懲且此事在光緒七年四月間前撫臣尙未到

任去歲因災捐賑刊有捐簿分別院東字樣任聽官民樂輸捐項幾及十萬任道銘按照捐數劃解皖省僅一萬五千兩有奇委無提撥六成之事以上各節委員所稟及紳民所言大致相同臣伏查任道銘於工賑兩事辦理尙屬認真庫款亦力求撙節惟需料過多逾期購辦印委各員或有稍涉操切之處任道銘未能覺察或所不免既因列保潘駿騷一案被參奉旨議處應否毋庸再議出自天恩臬司潘駿文在工一切布置其得力惟潘駿騷係其胞弟同在工次當差雖河工向無迴避明文究屬不知違嫌應請旨交部議處道員譚文煥雖少閱歷放賑尙能耐勞知府曹溶澄雖無大才人尙樸實且均經到工運河道糧特布才雖不優公事尙無貽誤原奏所參之譚文煥曹溶澄雖特布三員應請毋庸議知州王恩培於差役關礙事前雖未能約束事後曾經懲辦尙無不合惟濟甯州係屬衝繁之缺該州才具能否勝任應調省另行察看署章邱縣知縣木任惠民縣楊仰雲長清縣知縣徐福臻雖無折價肥己情事而辦理稽科未免操切楊仰雲徐福臻應請交部察議且查楊仰雲在章邱署內人地不甚相宜現已調省察看其餘所參情節訪查皆無確據應請均毋庸議得旨潘駿文著交部議處楊仰雲徐福臻均著交部察議○己卯諭軍機大臣等越南定失守該國局勢愈危滇省邊防尤爲喫緊前諭岑毓英等飭令唐炯出省統率防軍著卽僅令迅速前往開化督軍進紮相機備禦務令滇粵兩省互相聯絡以壯

聲威而固邊圉○是月法蘭西國使臣寶海回國參贊謝滿祿署理○奧大利亞國新簡駐華使臣薩魯斯齊抵任